



FEDERACIÓN GALEGA
DE BALONCESTO

REGULAMENTO XERAL
DA FEDERACIÓN GALEGA DE BALONCESTO

ÍNDICE

TITULO PRELIMINAR	1
TÍTULO PRIMEIRO - ESTATUTOS PERSOAIS	
CAPÍTULO PRIMEIRO - CLUBS	
SECCIÓN PRIMEIRA	
Afiliación.....	5
SECCIÓN SEGUNDA	
Denominación	5
SECCIÓN TERCEIRA	
Categoría dos clubs.....	5
SECCIÓN CUARTA	
Dereitos e obrigas.....	5
SECCIÓN QUINTA	
Cambio de residencia.....	8
SECCIÓN SEXTA	
Fusións.....	8
SECCIÓN SÉTIMA	
Baixas	9
SECCIÓN OITAVA	
Clubs vinculacións.....	9
CAPÍTULO SEGUNDO - XOGADORES	
SECCIÓN PRIMEIRA	
Definición e requisitos	10
SECCIÓN SEGUNDA	
Categorías	10
SECCIÓN TERCEIRA	
Licenzas.....	10
SECCIÓN CUARTA	
Baixas e cambios.....	11
SECCIÓN QUINTA	
Dereitos e obrigas.....	11
CAPÍTULO TERCEIRO - ADESTRADORES	
SECCIÓN PRIMEIRA	
Adestradores	13
SECCIÓN SEGUNDA	
Categorías	13
SECCIÓN TERCEIRA	
Licenzas.....	13
SECCIÓN CUARTA	
Dereitos e obrigas.....	14

CAPÍTULO CUARTO - ÁRBITROS

SECCIÓN PRIMEIRA

Definición e condición de árbitro 15

SECCIÓN SEGUNDA

Categorías 15

SECCIÓN TERCEIRA

Licenzas..... 15

SECCIÓN CUARTA

Dereitos e obrigas 16

CAPÍTULO QUINTO - DELEGADOS E ACOMPAÑANTES

SECCIÓN PRIMEIRA

Delegado de equipo 17

SECCIÓN SEGUNDA

Delegado de campo..... 17

SECCIÓN TERCEIRA

Delegado federativo..... 18

SECCIÓN CUARTA

Comisario de mesa 18

TÍTULO SEGUNDO - COMPETICIÓN

CAPÍTULO PRIMEIRO - NORMAS XERAIS

SECCIÓN PRIMEIRA

Tempada oficial..... 22

SECCIÓN SEGUNDA

Competicións oficiais 22

SECCIÓN TERCEIRA

Desempates 23

SECCIÓN CUARTA

Encontros..... 24

CAPÍTULO SEGUNDO - PARTICIPACIÓN EN COMPETICIÓN

SECCIÓN PRIMEIRA

Principios xerais..... 26

SECCIÓN SEGUNDA

Equipos: afiliacións, dilixenciamento e licenzas..... 28

SECCIÓN TERCEIRA

Equipo arbitral..... 28

SECCIÓN CUARTA

Liquidación de gastos zonais de arbitraje por club..... 29

CAPÍTULO TERCEIRO - TERREOS DE XOGO, DATAS, HORARIOS E UNIFORMES DE XOGO

SECCIÓN PRIMEIRA

Terreos de xogo..... 30

SECCIÓN SEGUNDA

Datas e horarios de encontros 31

SECCIÓN TERCEIRA

Cambios de datas ou terreos de xogo..... 31

SECCIÓN CUARTA

Cor dos uniformes de xogo 32

CAPÍTULO CUARTO

Suspensión e interrupción de encontros..... 33

CAPÍTULO QUINTO	
Balón de xogo	35
CAPÍTULO SEXTO	
Comités xurisdicionais de fases finais galegas	36
TÍTULO TERCEIRO - ÓRGANOS ADMINISTRATIVOS E TÉCNICOS DA FEDERACIÓN	
CAPÍTULO PRIMEIRO - ÓRGANOS ADMINISTRATIVOS	
SECCIÓN PRIMEIRA	
A xerencia	38
SECCIÓN SEGUNDA	
Secretaría xeral	38
SECCIÓN TERCEIRA	
Tesourería.....	39
CAPÍTULO SEGUNDO - ÓRGANOS TÉCNICOS	
SECCIÓN PRIMEIRA	
Normas xerais	40
SECCIÓN SEGUNDA	
Comité Galego de Árbitros	40
SECCIÓN TERCEIRA	
Comité de Actividades	40
SECCIÓN CUARTA	
Escola Galega de Adestradores.....	41
TÍTULO CUARTO - PROCEDEMENTOS PARA ASEMBLEAS	
CAPÍTULO PRIMERO	
Procedemento ordinario.....	44
CAPÍTULO SEGUNDO - PROCEDEMENTOS ESPECIAIS	
SECCIÓN PRIMEIRA	
Procedementos electorais	46
SECCIÓN SEGUNDA	
Procedemento da moción de censura.....	46
SECCIÓN TERCEIRA	
Procedemento para a reforma de estatutos	46
SECCIÓN CUARTA	
Procedemento para a extinción e disolución da federación	46
TÍTULO QUINTO – REGULAMENTO DISCIPLINARIO	
CAPÍTULO PRIMERO	
Disposicións xerais.....	50
CAPÍTULO SEGUNDO - DAS INFRACCIÓNS ÁS REGRAS DE XOGO	
SECCIÓN PRIMEIRA - NORMAS XERAIS	55
SUBSECCIÓN PRIMEIRA	
Das infraccións cometidas por xogadores, adestradores, delegados e directivos e das sancións.....	55

SUBSECCIÓN SEGUNDA	
As faltas cometidas polos compoñentes do equipo arbitral	56
SUBSECCIÓN TERCEIRA	
As faltas cometidas polos clubs	57
CAPÍTULO TERCEIRO	
Das infraccións ás Normas Xerais Deportivas	61
CAPÍTULO CUARTO - DO PROCEDEMENTO SECCIÓN PRIMEIRA	
Disposicións xerais	63
SECCIÓN SEGUNDA - DO PROCEDEMENTO	
SUBSECCIÓN PRIMEIRA	
Normas comúns	63
SUBSECCIÓN SEGUNDA	
Procedemento ordinario	64
SUBSECCIÓN TERCEIRA	
Procedemento extraordinario	65
SECCIÓN TERCEIRA	
Dos recursos	67

TÍTULO PRELIMINAR

TÍTULO PRELIMINAR

Art. 1.- O Regulamento Xeral da Federación Galega de Baloncesto é a norma básica de desenvolvemento dos estatutos desta. No documento regúlase o estatuto das persoas e entidades sometidas á xurisdición da federación, as normas xerais polas que se rexen as competicións que ela organiza, a súa estrutura orgánica, o seu réxime electoral, o procedemento nas súas asembleas e o seu réxime disciplinario.

Art. 2.- O Regulamento é norma de obrigado cumprimento para todas aquelas persoas que actúen dentro do ámbito de competencia da Federación Galega de Baloncesto.

Art. 3.- As presentes normas son comúns para todas as competicións organizadas pola FGB, sen prexuízo do establecido nos estatutos, disposicións da comunidade autónoma e normas específicas de cada competición no seu ámbito competencial.

TÍTULO PRIMEIRO

ESTATUTOS PERSOAIS

CAPÍTULO PRIMEIRO

CLUBS

Sección Primeira.- Afiliación

Art. 4.- Considéranse clubs deportivos de baloncesto as asociacións privadas que teñan por obxecto a promoción e a práctica desta modalidade deportiva, así como a participación en actividades e competicións deportivas, e estean inscritas na Federación Galega de Baloncesto.

Art. 5.- Para se afiliarse á Federación Galega de Baloncesto o club deberá solicitalo por escrito e achegar unha copia dos seus estatutos. Tamén deberán afiliarse á Federación Galega de Baloncesto as asociacións de clubs que se poidan crear e sempre como trámite previo para a asunción de competencias delegadas pola FGB. Os acordos tomados polas asociacións en uso da dita delegación deberán ser notificadas á FGB dentro do prazo dos 10 días posteriores á data da súa adopción.

Sección Segunda.- Denominación

Art. 6.- A denominación dun club non poderá ser igual á doutro xa existente dentro da mesma poboación, nin tan semellante que poida inducir a confusión ou erro.

Art. 7.- Os cambios de denominación dun club deberanse notificar á Federación Galega de Baloncesto; para isto achegarase a certificación acreditativa de se adoptar o acordo en forma estatutaria. Non se poderá usar a nova denominación sen se practicar a dita notificación.

Art. 8.- O nome dos equipos do club poderá levar unido o de un ou varios produtos ou marcas comerciais, para cuxo recoñecemento oficial se deberá notificar á Federación Galega de Baloncesto.

Art. 9.- En caso de que un club teña varios equipos, poderá diferencialos entre si, ben sexa denominando a cada un co nome do club, seguido dalgún elemento diferenciador, ou ben adxudicándolles nomes distintos. Nun ou noutro caso, co fin de evitar equívocos, ao finalizar a inscrición de cada equipo nas súas respectivas competicións, haberá de figurar primeiro o nome do club e a continuación o que distinga o equipo.

Art. 10.- Cando o club pertenza a unha asociación ou entidade non exclusivamente deportiva con sede, sucursais ou delegacións en distintas poboacións, poderá adoptar o nome da entidade seguido do da poboación que corresponda.

Sección Terceira.- Categoría dos clubs

Art. 11.- Os clubs serán clasificados en función daquel dos seus equipos que participe na competición de rango superior.

Sección Cuarta.- Dereitos e obrigas

Art. 12.- Os dereitos dos clubs son os seguintes:

A) Intervir como electores e elixibles nas eleccións a representante, polo seu estamento, da Asemblea Xeral e Comisión Delegada, así como do Presidente da Federación Galega de Baloncesto e, cando así proceda, do Presidente da Federación Española de Baloncesto.

B) Participar cos seus equipos nas competicións oficiais que lles correspondan pola súa categoría, nos termos e observando os requisitos determinados regulamentariamente así como os que estableza a FGB.

- C) Concertar e participar en encontros amigables con outros clubs federados ou estranxeiros, en datas compatibles coas sinaladas para as competicións oficiais, coa previa autorización, segundo o caso, da Federación Galega de Baloncesto, da Federación Española de Baloncesto e incluso, se fose preciso, do Ministerio de Asuntos Exteriores.
- D) Asistir e intervir nas reunións dos órganos federativos que lles correspondan de acordo coas normas vixentes.
- E) Optar ás axudas económicas que estableza a Federación Galega de Baloncesto para os clubs, na medida e ocasión que determinen as correspondentes normas.
- F) Asociarse para o cumprimento dos seus fins.
- G) Fusionarse, ou ceder os dereitos dun dos seus equipos, cos requisitos establecidos neste Regulamento.
- H) Todos os demais que a Federación Galega de Baloncesto estableza en cada caso.

Art. 13.- As obrigas dos clubs son as seguintes:

- A) Participar cos seus equipos nas competicións oficiais que lle correspondan pola súa categoría e observar os requisitos determinados regulamentariamente, así como os que estableza a FGB. Deberá sinalar o seu terreo oficial de xogo dentro da comunidade autónoma galega.
- B) Cumprir os estatutos, regulamentos e demais normas da Federación Galega de Baloncesto e da Federación Española de Baloncesto, así como os seus propios estatutos.
- C) Poñer a disposición da Federación Galega de Baloncesto e da Federación Española de Baloncesto os seus campos de xogo cando os ditos organismos os precisen.
- D) Contribuír ao sostemento económico da Federación Galega de Baloncesto, na medida que lles corresponda, aboando as correspondentes cotas, dereitos e compensacións económicas que se determinen, así como as sancións que lles sexan impostas polos órganos correspondentes.
- E) Aboar os dereitos de arbitraje que, segundo as normas federativas, lles corresponden, así como liquidar dentro de cada tempada as débedas xeradas coas federacións (galega e española), cos seus xogadores ou técnicos e con outros clubs no transcurso da competición.
- F) Manter a disciplina deportiva e evitar situacións de violencia ou animosidade con outros membros ou estamentos do baloncesto.
- G) Cubrir, atender e contestar coa maior dilixencia as comunicacións que reciban dos organismos federativos e auxiliares destes; deberanse facilitar todos os datos que soliciten. Ademais deberán facilitar a xustificación sobre partidas económicas, sempre que se trate da aplicación sobre subvencións que lle competen á FGB.
- H) Facilitar a asistencia dos seus xogadores e técnicos ás seleccións autonómicas e zonais e ás actividades federativas de perfeccionamento técnico.
- I) Coidar da máis perfecta formación deportiva dos seus xogadores, facilitando os medios precisos para isto e garantindo a súa efectiva e plena actividade deportiva.
- J) Dispor para os seus encontros oficiais dun terreo de xogo que cumpra os requisitos regulamentarios.
- K) Contar cun adestrador con título oficial para cada un dos equipos que teñan nas súas diferentes categorías, nos termos establecidos regulamentariamente.
- L) Recoñecer para todos os efectos as tarxetas de identidade expedidas pola Federación Galega de Baloncesto e pola Federación Española de Baloncesto.
- M) Facilitarlles a entrada de balde no recinto deportivo aos membros do equipo contrario provistos de licenza federativa así como aos representantes federativos debidamente provistos da súa credencial.
- N) Cumprir as obrigas establecidas no artigo 52 en canto lles afecte.

O) Comunicar á Federación as modificacións estatutarias, o nomeamento e cesamento de directivos ou administradores e os acordos de fusión, escisión ou disolución.

P) Presentar a documentación e demais requisitos que sexan necesarios para formalizar a inscrición de cada equipo, segundo o establecido nas Normas Específicas para as Competicións da FGB.

Q) Cubrir, mediante un seguro obrigatorio, os riscos derivados da práctica do baloncesto aos xogadores e adestradores.

Sen prexuízo das accións que se poidan exercer ante a xurisdición competente, o club que incumprise as súas obrigas respecto dos seus xogadores ou adestradores, dando lugar á desvinculación destes con aquel mediante o oportuno expediente ante os órganos xurisdicionais federativos, non poderá cubrir as anteditas baixas durante o resto da tempada de que se trate, agás no suposto de que entre o club e o xogador ou adestrador mediase unha relación laboral de carácter especial.

Art. 14.- Todos os clubs cubrirán anualmente a ficha autonómica do club, e recollerase nela a súa actividade na tempada.

Os clubs de nova creación formalizarán a primeira ficha autonómica do club ao inscribiren os seus equipos. A formalización desta ficha será requisito indispensable para exercer os dereitos que lle corresponden ao club.

Art. 15.- Dentro do prazo que determinen as bases de cada competición, todos os clubs están obrigados a inscribir os seus equipos cubrindo a folla de inscrición correspondente a cada un.

Art. 16.- O club propietario ou non do terreo, por mediación do seu delegado de campo, terá disposto coa suficiente antelación o encontro:

A) O terreo de xogo en debidas condicións, marcado regulamentariamente, e as canastras, redes e aros debidamente colocados, cunha antelación mínima de 20 minutos á hora marcada para o comezo do encontro, co fin de que o equipo visitante poida, se o desexa, adestrar.

B) Unha mesa e cadeiras para os oficiais dos árbitros, así como cadeiras ou bancos para os equipos.

C) O equipo técnico necesario, marcador, cronómetro e 24 segundos, para a boa marcha do encontro.

D) Os medios de separación indispensables entre o terreo de xogo e o público, de acordo coas regras oficiais de xogo e coas medidas de seguridade establecidas pola Federación Galega de Baloncesto para o equipo arbitral e visitante.

E) Os vestiarios, independentes, para os árbitros e os dous equipos, coas debidas medidas de hixiene e seguridade.

Art. 17.- O club local é responsable da boa orde antes, durante e despois do encontro, tanto dos xogadores como do público en xeral. Para isto debe solicitar, coa necesaria antelación, a presenza da forza pública. En caso de non facelo, calquera incidente que se produza incluso nos exteriores e anexos ao recinto do terreo de xogo, seralle imputable ao club.

Nas competicións de ámbito zonal, a delegación correspondente poderá substituír esta medida de seguridade por outra que lle mereza plena garantía, ben con carácter xeral ou soamente para determinados encontros. En caso de non cumprir co determinado neste artigo, o club recibirá a sanción que os comités determinen en función da súa gravidade.

O club propietario, con auxilio da forza pública, poderá expulsar do recinto de xogo aquelas persoas que sexan responsables de disturbios durante o transcurso do encontro e poderanse incluso emprender as accións xudiciais oportunas fronte a elas polos prexuízos que poidan irrogar co seu comportamento.

Igualmente, o dito club poderá establecer as medidas de control que estime oportunas, co fin de impedir que os espectadores accedan ao campo provistos de obxectos que poidan entrañar perigos físicos para os participantes ou o público.

Art. 18.- Para acreditar que foi solicitada a forza pública, o delegado de campo presentarlle ao árbitro principal un duplicado da solicitude correspondente, co selo de entrada no organismo que proceda. Será obrigatoria a súa presentación unicamente en competicións de ámbito sénior autonómico.

Sección Quinta.- Cambio de residencia

Art. 19.- Cando un club efectúe un cambio de residencia que implique un cambio de delegación só poderá iniciar a súa actividade pola categoría inferior que exista na delegación de nova residencia, salvo o exposto no apartado seguinte. Para cambiar de residencia sen perda de categoría, o club, tras o acordo previo de forma estatutaria, solicitarallo á Federación Galega de Baloncesto, antes do comezo da tempada, e expoñerá as razóns que o movan a isto. A FGB, á vista dos documentos, adoptará a determinación que proceda.

Sección Sexta.- Fusións

Art. 20.- Os clubs poderán fusionarse cando o estimen conveniente para o cumprimento dos seus fins sociais. Os acordos de fusión deberanse adoptar segundo o procedemento, e co réxime de maiorías que establezan os respectivos estatutos. Estes acordos deberán ser publicados nun xornal da localidade ou, no seu defecto, da provincia.

Así mesmo, os ditos acordos e os estatutos da entidade resultante da fusión, serán remitidos a esta Federación Galega de Baloncesto.

Os acordos de fusión, de constitución dun novo club como consecuencia dunha escisión, deberán ser notificados á Federación Galega de Baloncesto dentro do prazo de inscrición establecido nas respectivas competicións. Unha vez transcorrido o devandito prazo sen que se reciba a notificación, os clubs perderán os dereitos que adquirisen no ámbito federativo, como consecuencia dos referidos acordos.

Art. 21.- Ademais do previsto no artigo precedente, o club resultante da fusión deberá cumprir os restantes requisitos que se lles esixen aos clubs de nova creación e subrogarse en todos os dereitos e obrigas que no ámbito da actividade federativa posuían os clubs orixinais. Para tal efecto, o club resultante da fusión poderá manter os seus equipos nas categorías ás que tiñan dereito os equipos dos clubs fusionados, salvo coincidencia de máis de un equipo nalguna das categorías en que isto estea permitido e respectando o disposto no artigo 117 deste Regulamento.

Art. 22.- Cando un club teña varias seccións deportivas e adopte o acordo de escindir a sección de baloncesto, poderase constituír un novo club que se subrogará nos dereitos e obrigas que na orde federativa posuía o club do que se escindiu, e manterá a súa participación na competición que tiña dereito o club orixinario.

O club que se constituía como consecuencia da escisión deberá remitirlle á FGB o acordo de escisión e a copia da acta de constitución e dos estatutos.

Así mesmo, o acordo de escisión deberá ser publicado nun xornal da localidade ou, no seu defecto, da provincia. Idéntico procedemento que o previsto nos parágrafos anteriores poderase utilizar cando un club que practique a modalidade de baloncesto en categorías masculina e feminina, acorde escindir unha destas categorías.

Art. 23.- A sección de baloncesto dun club polideportivo que se independice, antes de se inscribir como club de baloncesto, poderase fusionar con outro existente ou cun club polideportivo, xa tivese este ou non sección de baloncesto. Neste caso, seguirase o disposto no artigo anterior.

Art. 24.- Cando dous clubs polideportivos cuxo deporte principal non sexa o baloncesto se fusionen de acordo coas normas que rexan na Federación Galega de Baloncesto na que inscribisen os seus estatutos, as seccións de baloncesto correspondentes, se non se independizan, fusionaranse igualmente, en canto isto non contraveña o disposto neste Regulamento, para cuxo fin poñerano en coñecemento da Federación Galega de Baloncesto.

Art. 25.- Os clubs poderán allear ou ceder en beneficio doutro club os dereitos de participar en competicións oficiais sénior de ámbito autonómico. Os ditos acordos deberanlle ser comunicados á FGB para que outorgue a oportuna autorización, tras o pagamento previo do canon correspondente, reflectido nas bases de competición da FGB.

Así mesmo, o club resultante estará obrigado a facer efectivas as débedas que por razóns deportivas tivese o club orixinario segundo resulte dos arquivos da FGB, á data de presentación da notificación dos acordos.

Art. 26.- Os clubs que se fusionasen, ou o club polideportivo que independice a sección de baloncesto, non se poderán afiliarse novamente á Federación Galega de Baloncesto como clubs independentes e de nova creación ata unha vez transcorrida unha tempada.

Sección Sétima.- Baixas

Art. 27.- Os clubs, tras o acordo previo adoptado en forma estatutaria, poderán darse de baixa na Federación Galega de Baloncesto. Así mesmo, os órganos xurisdicionais da Federación Galega de Baloncesto, de oficio, poderán acordar a baixa dun club tras a incoación previa do oportuno expediente disciplinario, regulado nos artigos 54 e seguintes do Regulamento Disciplinario, por falta de pagamento de licenzas, unha vez finalizada a tempada e tras ser requirido para isto, nun prazo de quince días; na seguinte tempada terá que se inscribir, se o desexa, na última categoría que exista na súa delegación zonal.

Sección Oitava.- Vinculacións

Art. 28.- Exclusivamente para competicións organizadas pola Federación Galega, permítese a vinculación dun equipo concreto dun club con outro club distinto, de forma que calquera xogador do equipo vinculado poida aliñarse no equipo de categoría ou competición contigua superior do club vinculante, coas mesmas condicións de como o faría se o equipo fose do seu club, sempre e cando o club vinculado non teña ningún equipo inscrito na competición na que vai xogar o xogador co equipo vinculante. Para que un xogador se poida inscribir na acta do encontro deberá presentar a ficha do seu club e o documento de vinculación.

Os equipos da categoría do equipo vinculado pertencente o club vinculado consideranse como equipos do clube vinculante a efectos clasificatorios e dereitos de ascenso.

Ningún equipo poderá estar vinculado con máis de un club.

Esta vinculación formalizarase no documento de vinculación, antes do 31 de decembro de cada tempada, e suporá unha cota de vinculación fixada nas bases de competición que deberá aboar o club vinculante á FGB.

CAPÍTULO SEGUNDO

XOGADORES

Sección Primeira.- Definición e requisitos

Art. 29.- É xogador/a a persoa natural que practica o baloncesto e subscribise a correspondente licenza federativa para iso. Coa sinatura da mencionada licenza, e contrato se o houbese, establecido para os efectos, queda vinculado ao seu club e suxeito á disciplina da Federación Galega de Baloncesto.

Art. 30.- Para que un xogador poida subscribir licenza deberá reunir os requisitos seguintes:

A. Ser español, ou posuír a nacionalidade dalgún dos estados membros da Unión Europea ou do Espazo Económico Europeo ou, no caso de xogadores non comunitarios, esixirase que estea residindo legalmente en España, segundo a lexislación española vixente nese momento, o cal deberá demostrar con documentación orixinal.

B. Non ter compromiso vixente con outro club ou federación.

Art. 31.- A vinculación entre xogador e club finalizará por vencemento do prazo establecido, por mutuo acordo ou por decisión do órgano federativo ou xudicial competente, nos casos e formas que estableza a normativa vixente.

Sección Segunda.- Categorías

Art. 32.- Os xogadores serán clasificados en función dos seguintes criterios:

a) O seu sexo b) A súa idade

c) A categoría da competición en que participe

Excepcionalmente nas categorías de infantil, minibasket e preminibasket os xogadores poderán non ser clasificados en función do seu sexo, situación que se deberá reflectir expresamente nas bases de cada competición.

Os anos de nacemento serán modificados anualmente pola comisión delegada da FGB co fin de adecualos ás categorías oficiais das competicións.

Art. 33.- A Federación Galega de Baloncesto autorizará a concesión de licenza de categoría superior á correspondente pola súa idade, tras a solicitude previa do xogador, acompañada do certificado médico de aptitude e da autorización de quen teña a patria potestade sobre o xogador.

Art. 34.- O xogador con licenza de categoría superior á da súa idade non poderá aliñarse en toda a tempada na categoría da súa idade, aínda que poderá formar parte de seleccións ou combinados. Na tempada seguinte poderá volver á súa categoría se aínda está dentro dela pola súa idade.

Sección Terceira.- Licenzas

Art. 35.- O xogador deberá dispor da licenza oficial correspondente, debidamente dilixenciada pola Federación Galega de Baloncesto.

Art. 36.- A sinatura da licenza ten carácter de declaración formal do xogador respecto dos datos que nela figuran, responsabilízao da súa veracidade e da concorrencia dos requisitos esixidos por este regulamento.

Art. 37.- As licenzas dos xogadores terán validez para unha tempada.

Art. 38.- Ao finalizar o período de vixencia da licenza, todo xogador quedará en absoluta liberdade para subscribir licenza con calquera club.

Art. 39.- O xogador menor de idade, que cambie de localidade de residencia por motivos familiares ou de traballo dos pais, debidamente acreditados ante a Federación Galega de Baloncesto, terá dereito a subscribir licenza por un equipo da nova residencia familiar, sempre e cando estea dentro dos prazos establecidos nas bases de competición. Este artigo tamén será de aplicación para xogadores maiores de idade que acrediten ante o órgano competente da FGB o seu traslado por motivos laborais.

Art. 40.- A Federación esixiralle ao xogador que xustifique a súa idade mediante o seu documento nacional de identidade. Este documento só poderá ser substituído polo orixinal do pasaporte individual. No caso de xogadores non comunitarios, esixiráselles o pasaporte do seu país ou ben o NIE.

Art. 41.- Ningún xogador poderá subscribir licenza máis que por un só equipo do mesmo club.

Cando un xogador sexa provisto de licenza por máis dun equipo do mesmo club, pero de distinta categoría, considerarase válida a expedida en primeiro lugar cronoloxicamente, e se isto non se puidese determinar, considerarase válida a do equipo de máxima categoría; serán anuladas automaticamente as demais dende a data de validez daquela, polo que se considerará aliñación indebida a súa participación en encontros de categorías inferiores.

Sección Cuarta.- Baixas e cambios

Art. 42.- A vinculación entre xogador e club poderá ser dada por finalizada por decisión do comité de competición competente, mediante un expediente promovido a petición de calquera das dúas partes e baseado en incumprimento de obrigas pola outra parte e, en xeral, no disposto no presente regulamento.

Art. 43.- Se a resolución do expediente á que se refire o precedente artigo estimase a presentación do xogador, outorgaráselle a correspondente carta de liberdade.

No caso de que a resolución fose favorable ao club, autorizarase a este a cubrir a súa vacante con outro xogador, sen afectar á cota máxima que lle corresponde.

Art. 44.- No curso da tempada, un xogador que sexa aliñado e xogue, non poderá cambiar de equipo salvo o disposto no artigo anterior ou que se cumpran as condicións seguintes:

A) Que, no caso de que o equipo sexa de club distinto, conte coa correspondente carta de desvinculación outorgada polo club.

B) Que o novo equipo participe nunha competición distinta á que participa o equipo de procedencia.

Art. 45.- No curso dunha tempada autorizarase a un xogador o cambio de equipo calquera que sexa a súa categoría cos condicionantes reflectidos no artigo anterior. Tamén se autorizará o cambio de equipo o xogador que non se aliñe ou, facéndoo, que non xogue dentro da tempada en ningún encontro oficial co seu equipo de procedencia. En ambos os casos, debe obter previamente a carta de desvinculación.

Sección Quinta.- Dereitos e obrigas

Art. 46.- O xogador ten os seguintes dereitos:

A) Liberdade para subscribir licenza, respectando os compromisos adquiridos. B) Intervir como electores e elixibles nas eleccións a representante, polo seu estamento, da asemblea xeral e comisión delegada, así como do presidente da Federación Galega de Baloncesto e da Federación Española de Baloncesto, cando así proceda.

- C) Asistir e participar en cantas probas, cursos, fases de preparación, seleccións ou outro tipo de concentración, sexa convocado pola Federación Galega de Baloncesto ou polas súas delegacións zonais.
- D) Ser recoñecido medicamente polo seu club, de acordo coas directrices determinadas pola Federación Galega de Baloncesto, e por esta unicamente cando se trate de selección ou concentracións organizadas por ela.
- E) Ser adestrado por adestrador titulado.
- F) Consideración á súa actividade deportiva.
- G) Recibir o material deportivo para a práctica do baloncesto.
- H) Recibir atención sanitaria de balde e adecuada en caso de lesión deportiva, ben por atención directa do club ou a través dos concertos voluntarios ou obrigatorios que a entidade teña coa Mutualidade Xeral Deportiva ou outra entidade pública ou privada, que outorgue como mínimo as mesmas prestacións.
- I) Participar nas sesións de adestramento e nos encontros do seu equipo, salvo decisión disciplinaria.
- J) Ao cumprimento das estipulacións pactadas cos clubs.

Art. 47.- O xogador ten as seguintes obrigas:

- A) Someterse á disciplina do seu club que se axuste ao disposto no ordenamento xurídico, e participar nos adestramentos e encontros do seu equipo.
- B) Non intervir en actividades deportivas cun equipo distinto do seu sen autorización do club.
- C) Utilizar, coidar e, cando sexa requirido para iso, devolver o material deportivo que o club lle entregase para tal fin. Se un xogador se negase a devolver o material ou o devolvese mal coidado, o club poderallo reclamar facéndollo constar á FGB, a cal poderá incluso non tramitar ou deixar en suspenso a ficha dese xogador ata resolver esta situación.
- D) Asistir ás convocatorias das seleccións deportivas galegas ou da súa delegación zonal para participar en competicións de carácter nacional ou internacional, ou para a preparación destas, así como aos plans de tecnificación que convoque a FGB.
- E) Sen prexuízo das accións que poidan exercerse ante a xurisdición competente, o incumprimento das obrigas por parte dun xogador respecto do seu club, que dea lugar á desvinculación dalgún destes con aquel, mediante o oportuno expediente ante os órganos xurisdicionais federativos, determinará a imposibilidade do dito xogador para actuar noutro club durante o resto da tempada de que se trate.

CAPÍTULO TERCEIRO

ADESTRADORES

Sección Primeira.- Adestradores

Art. 48.- Son adestradores as persoas naturais con título recoñecido pola Federación Galega de Baloncesto ou pola Federación Española de Baloncesto, dedicadas á ensinanza, preparación e dirección técnica do baloncesto, tanto a nivel de clubs como da propia Federación.

Art. 49.- A sinatura da licenza polo adestrador implica a súa vinculación ao club e o seu sometemento á disciplina da Federación.

Art. 50.- Para que un adestrador poida subscribir licenza por un club, ademais de ter o título correspondente, deberá estar en posesión da licenza anual expedida pola Federación Galega de Baloncesto.

Art. 51.- A titulación oficial dos adestradores será outorgada pola Federación Española de Baloncesto, que en calquera caso recoñece a titulación expedida polos centros legalmente recoñecidos, de conformidade co disposto no artigo 55.4 da Lei 10/1990, do 15 de outubro, do deporte. Para os efectos da obtención e expedición de títulos oficiais adaptarase ao previsto nos reais decretos 1913/1997, do 19 de decembro e 234/2005, do 4 de marzo, así como na Orde ECD/3310/2002, do 16 de decembro.

Sección Segunda.- Categorías

Art. 52.- Respectando as competencias nacionais, as titulacións que serán necesarias para actuar á fronte dun equipo son as seguintes:

-Diploma de Adestrador de iniciación: minibasket e infantil.

. Se un equipo se clasificase para campionatos de España ou similares que dependan da FEB será necesaria a titulación esixida pola mesma.

-Diploma de Adestrador de nivel I ou certificado de primeiro nivel dos estudos conducentes ao título de Técnico deportivo en baloncesto: minibasket, infantil, infantil 1ª División, cadete e Júnior de 2ª División, 3ª e 4ª División Masculina e 2ª División Feminina.

Se un equipo se clasificase para campionatos de España ou similares que dependan da FEB e será necesaria a titulación esixida pola mesma.

- Diploma de Adestrador de nivel II ou título de Técnico deportivo en baloncesto: cadete e júnior de 1ª División, competicións sénior de carácter autonómico e interautonómico e seleccións autonómicas.

-Diploma de Adestrador de nivel III ou título de Técnico deportivo superior en baloncesto: Competicións sénior de carácter nacional e seleccións nacionais.

Con carácter excepcional a Secretaría Xeral da FGB, a proposta da área de adestradores, poderá autorizar or unha sola temporada, a actuación de adestradores co certificado ou titulación inmediata inferior a esixida para a categoría correspondente. Con carácter previo a concesión da autorización os adestradores deberán ingresar a cota cos dereitos de inscrición da titulación esixida, co que quedarán inscritos no mesmo. De non presentarse o curso perderán a cantidade ingresada”.

A partir da temporada 19-20 non serán admitidas as titulacións federativas emitidas por federacións distintas a FGB con posterioridade o 30.06.19. Sólo se admitirán as titulacións académicas.

Sección Terceira.- Licenzas

Art. 53.- O adestrador deberá dispor da licenza oficial correspondente, debidamente dilixenciada. Cada licenza terá validez por unha tempada.

Art. 54.- A sinatura da licenza ten carácter de declaración formal do adestrador respecto dos datos que figuran nesta; responsabilízase da súa veracidade e da concorrencia dos requisitos esixidos por este regulamento.

Art. 55.- O adestrador dun club con licencia dun equipo do mesmo club poderá exercer as súas funcións como adestrador en calquera equipo de devandito club con esta única licenza, sempre que estes equipos sexan de inferior categoría para que estea tramitada a licenza. Excepcionalmente, permitirase que un adestrador poida subscribir licenza por dous clubs, sempre que, ademais das condicións anteriores non subscriba licenza por equipos que participen na mesma competición.

Art. 56.- Un mesmo equipo pode ter máis dun adestrador. Cando menos, un dos adestradores inscritos no tríptico debe estar presente en cada partido. En caso de que non se poida cumprir por algunha razón o exposto no parágrafo anterior, o árbitro deberá facer figurar esta anomalía no reverso da acta para os efectos que procedan.

Art. 56-Bis.- A) A vinculación entre adestrador e club poderá ser dada por finalizada por decisión do comité de competición competente, mediante un expediente promovido a petición de calquera das dúas partes e baseado en incumprimento de obrigas pola outra parte e, en xeral, no disposto no presente regulamento.

B) No curso da tempada, un adestrador poderá cambiar de equipo se se cumpre algunha das condicións seguintes:

- Que, no caso de que o equipo sexa de club distinto, conte coa correspondente carta de desvinculación outorgada polo club.
- Que o novo equipo participe nunha competición distinta á que participaba o equipo de procedencia.

Sección Cuarta.- Dereitos e obrigas

Art. 57.- O adestrador ten os seguintes dereitos:

A) Liberdade para subscribir licenza, de acordo coas normas establecidas e con respecto dos compromisos adquiridos.

B) Intervir como electores e elixibles nas eleccións a representantes, polo seu estamento, da asemblea xeral e comisión delegada, así como do presidente da Federación Galega de Baloncesto e cando así proceda, da Federación Española.

C) Asistir ás probas e cursos de preparación aos que sexa convocado pola Federación Galega de Baloncesto, sen prexuízo das obrigas para o seu club.

D) Recibir atención sanitaria de balde e adecuada en caso de lesión deportiva, ben por atención directa do club ou a través do seguro obrigatorio que o club deberá ter coa Mutualidade Xeral Deportiva, ou outra entidade pública ou privada, que outorgue como mínimo as mesmas prestacións.

E) Recibir o material deportivo preciso para a súa actividade.

F) Ao cumprimento das estipulacións pactadas co club sempre que non infrinxan as normas da FIBA.

Art. 58.- O adestrador ten as seguintes obrigas:

- A) Someterse á disciplina das entidades deportivas ás que se encuentre vinculado por licenza.
- B) Non intervir en actividades deportivas cun equipo distinto do seu/s, sen autorización do seu club.
- C) Utilizar, coidar e, cando sexa requirido para iso, devolver o material deportivo que o club lle entregue.
- D) Asistir ás probas e cursos aos que sexa convocado pola Federación.

CAPÍTULO CUARTO

ÁRBITROS

Sección Primeira.- Definición e condición de árbitro

Art. 59.-

1. Son árbitros, coas categorías que regulamentariamente se determinen, as persoas naturais que, tras obter a correspondente licenza federativa coidan da aplicación das regras oficiais de xogo e demais normas de aplicación durante os encontros, e posúen a máxima autoridade dentro do terreo de xogo.
- 2.- Son oficiais de mesa as persoas naturais que tras obter a correspondente licenza federativa colaboran cos árbitros no desempeño da súa función durante os encontros.
- 3.- Terán a consideración de técnicos arbitrais aquelas persoas que subscriban a pertinente licenza, desenvolvan funcións de dirección, formación e inspección dentro deste colectivo.
- 4.- Son aspirantes a árbitro u oficiais de mesa aquelas persoas que teñan menos de 14 anos, e que tendo pasado as probas de acceso a calquera deste estamentos por razón da súa idade, aínda non podan ser árbitros u oficiais de mesa.

Art. 60.- Para que un árbitro ou oficial de mesa poida subscribir licenza federativa deberá reunir as condicións seguintes:

- A) Ter máis de catorce anos.
- B) Posuír o título oficial de árbitro ou oficial de mesa, recoñecido pola Federación Galega de Baloncesto.

Excepcionalmente, os adestradores, sexa cal sexa a súa titulación, así como os xogadores de categorías cadete, júnior e sénior, poderán ser árbitros ou oficiais de mesa das categorías preminibasket, minibasket, infantil e cadete zonal sempre e cando se autorice a súa colaboración por parte da delegación zonal correspondente.

Para que un técnico arbitral poida obter licenza federativa deberá ser árbitro ou oficial de mesa en activo. Será incompatible a condición de técnico arbitral con calquera outra actividade no seo da Federación Galega de Baloncesto.

Excepcionalmente expedirase licenza os aspirantes a árbitro ou oficial de mesa que teñan menos de 14 anos e pasaran as probas de acceso a calquera destes estamentos.

Art. 61.- A titulación oficial dos árbitros e oficiais será expedida pola Federación Galega de Baloncesto, a través do Comité Galego de Árbitros de Baloncesto (CGAB).

Sección Segunda.- Categorías

Art. 62.- Os árbitros e oficiais de mesa poderán ser clasificados por categorías.

A clasificación dos árbitros será efectuada pola Federación Galega de Baloncesto a través do Comité Galego de Árbitros. Para levar a cabo tal clasificación poderá establecer as probas que considere oportunas. É obrigatorio que os aspirantes a árbitros e oficiais de mesa

superen un cursiño de formación e unha proba final que os habilite para o desenvolvemento das súas funcións. Estableceranse dous niveles formativos:

- Título iniciación: competicións zonais para a temporada en curso. Unha vez superado o cursiño poderá ser convocado para competicións autonómicas, tanto os árbitros como os oficiais de mesa.
- Título nivel I: competicións de carácter autonómico.

Sección Terceira.- Licenzas

Art. 63.- Os árbitros, oficiais de mesa e técnicos arbitrais deberán dispor da licenza oficial correspondente, debidamente dilixenciada a través do Comité Galego de Árbitros de Baloncesto. Cada licenza terá validez por unha tempada.

Art. 64.- A sinatura da licenza ten carácter de declaración formal do árbitro, oficial de mesa ou técnico arbitral, respecto dos datos que figuran nesta, responsabilízao da súa veracidade e da concorrencia dos requisitos esixidos por este regulamento.

Sección Cuarta.- Dereitos e obrigas

Art. 65.- Son dereitos dos árbitros, oficiais de mesa e técnicos arbitrais os seguintes:

- A) Asistir ás probas e cursos de perfeccionamento ou divulgación aos que sexa convocado pola Federación Galega de Baloncesto ou polas delegacións zonais.
- B) Estar en posesión dun seguro obrigatorio que cubra os riscos derivados da práctica da modalidade deportiva correspondente.
- C) Percibir dos clubs as compensacións económicas que se establezan con carácter anual, a través do Comité Galego de Árbitros.
- D) Ser clasificado nunha das categorías que se establezan pola Federación Galega de Baloncesto, a través do Comité Galego de Árbitros.
- E) Intervir como electores e elixibles nas eleccións a representante, polo seu estamento, da asemblea xeral e comisión delegada, así como do presidente da Federación Galega de Baloncesto e, cando así proceda, da Federación Española.

Art. 66.- Son obrigas dos árbitros e oficiais de mesa:

- A) Someterse á disciplina da Federación Galega de Baloncesto, do Comité Galego de Árbitros e dos seus comités zonais.
- B) Non intervenir en actividades deportivas relacionadas co baloncesto sen autorización da Federación Galega de Baloncesto.
- C) Asistir ás probas e cursos aos que sexa convocado pola Federación Galega de Baloncesto ou polas delegacións zonais.
- D) Retirar semanalmente as designacións dos encontros, darse por informados destas, segundo as normas do Comité Galego de Árbitros ou dos comités zonais.
- E) Asistir e exercer as súas funcións nos encontros deportivos para os que sexan designados. Para que esta obriga quede dispensada, os colexiados deberán xustificar a súa indispoñibilidade debidamente e coa antelación prevista nas normas do Comité Galego de Árbitros e dos seus comités zonais. Calquera membro do CGAB ou dos seus comités poderá solicitar non ser designado para ningún encontro durante un determinado período de tempo; para isto deberá presentar debidamente cuberto o impreso oficial para formalizar a súa solicitude. Non se admitirá ningunha solicitude con menos de cinco días de antelación á data de desenvolvemento da xornada. Excepcionalmente, e a xuízo da FGB poderase autorizar algunha solicitude fóra do prazo sinalado, sempre que esta estiver debidamente xustificada.
- F) Coñecemento das regras de xogo e regulamentos da FGB.

G) Aqueles outros que lles veñan impostos pola lexislación vixente, polos estatutos, normas específicas de competición ou polos acordos adoptados polos órganos da Federación Galega de Baloncesto.

H) Estar ao corrente do pagamento das súas cotas.

I) Dar unha dispoñibilidade suficiente, xustificando expresamente a non dispoñibilidade por escrito e acorde á normativa administrativa vixente do CGAB.

Sección Quinta.- Comisario de mesa

Art. 67.- Calquera club pode solicitar a designación dun comisario de mesa para un encontro determinado. A petición deberase facer por escrito á FGB con 5 días de antelación ao desenvolvemento do encontro.

Cando a federación correspondente ou algún dos seus órganos disciplinarios decidan a realización dun encontro con menos de 15 días de antelación, a FGB poderá autorizar as peticións de comisario de mesa realizadas fóra do prazo establecido no parágrafo anterior.

Art. 68.- Se a FGB autoriza a petición, o CGAB designará o comisario de mesa, e esixirase que a persoa nomeada non pertenza á zona ou zonas dos equipos que interveñan no encontro. En casos excepcionais a FGB, de oficio, poderá instar o CGAB a que designe un comisario de mesa para un determinado encontro.

Art. 69.- O comisario de mesa comparecerá no campo de xogo con unha hora de antelación á hora oficial de xogo fixada para o inicio do encontro e deberá acreditarse perante o delegado federativo, cando o houber, perante o equipo arbitral e perante os delegados dos equipos.

Art. 70.- O comisario de mesa ocupará sempre un lugar na mesa de anotadores para supervisar a súa actuación.

Art. 71.- Serán funcións do comisario de mesa as seguintes:

- Revisar e custodiar os trípticos e as licenzas, así como os respectivos documentos de identificación, ata que os árbitros, ao final do partido, acorden a súa devolución aos equipos.
- Nos casos en que o considere conveniente poderá solicitar a presentación do DNI orixinal.
- Controlar a correcta actuación do anotador, cronometrador e encargado da regra de 24 segundos.
- Aclarar e corrixir as posibles anomalías que tivesen lugar na anotación e/ou cronometraxe durante o encontro.
- Advertir o equipo arbitral de calquera irregularidade que se producise en calquera destes supostos.
- Realizar obrigatoriamente un informe que deberá estar dentro das 48 horas seguintes en poder da FGB e do seu comité de competición cando así o esixa o seu contido.

Art. 72.- Os gastos que orixine a petición do comisario de mesa serán por conta do club que o solicite ou por conta da FGB cando esta o nomee de oficio.

CAPÍTULO QUINTO

DELEGADOS E ACOMPAÑANTES

Sección Primeira.- Delegado de equipo

Art. 73. Os equipos poderán contar con un ou con varios delegados de equipo, que serán as persoas que exerzan a representación do club e que se ocuparán dos cometidos administrativos, así como de auxiliar o adestrador nas tarefas que este lle sinale.

Art. 74.- O delegado de equipo deberá estar provisto da correspondente licenza federativa. Un mesmo delegado poderá ter licenza por varios equipos do mesmo club.

A condición de delegado de equipo é incompatible coa de adestrador así como coa de xogador no transcurso dun encontro.

Art. 75.- O directivo, o médico, o director técnico, o adestrador, o preparador físico e o encargado do material asimiláranse aos delegados de equipo, e deberán contar coa oportuna licenza federativa.

Art. 76.- Non poderá actuar como delegado de campo a persoa que o está facendo no mesmo encontro como delegado de equipo, co fin de que aquel poida cumprir correctamente coas súas obrigas.

Sección Segunda.- Delegado de campo

Art. 77.- É delegado de campo a persoa que, provista da correspondente licenza federativa, ten ao seu cargo a coordinación da orde no terreo de xogo.

A licenza de delegado de campo habilita para desenvolver o seu labor en todos os equipos do mesmo club.

Nas competicións zonais e en categorías ata júnior, a figura do delegado de campo pasa a ser voluntaria, non obstante, as obrigas deste serán asumidas polo club local.

Art. 78.- O delegado de campo presentarase ao equipo arbitral e, de ser o caso, ao delegado federativo antes de dar comezo o encontro para acompañalos dende a entrada do recinto deportivo ata os seus vestiarios e dende estes ao terreo de xogo antes do comezo, durante o descanso e ao final do encontro, ou en calquera outra circunstancia en que resulte oportuno, cumprindo as instrucións que reciba do equipo arbitral ou do delegado federativo.

O delegado de campo darase a coñecer ao equipo visitante, actuará de enlace entre os equipos contendentes e sinalará os vestiarios que se han utilizar.

O delegado de campo por razóns de forza maior pode ser substituído por un directivo do club tras acreditarse co DNI.

Art. 79.- As funcións do delegado de campo serán entre outras as seguintes: A) Facilitarlles a ambos os equipos bancos ou cadeiras suficientes para situar o adestrador, os xogadores, o delegado de equipo e asimilados, provistos de licenza federativa.

B) Ordenar a colocación dos bancos ou cadeiras á distancia regulamentaria da mesa de anotación, convenientemente illados do público, e impedirán que se sitúen neles persoas non autorizadas.

C) Responder da boa orde; solicitarán a intervención necesaria da forza pública antes, durante e despois do encontro.

D) Velar pola integridade física dos árbitros e das súas pertenzas dende unha hora antes ata que estes o consideren oportuno. No caso de forza maior, de non estar presente o delegado de campo, poderá realizar as súas funcións un directivo do club (que conste como tal na FGB), debidamente identificado co seu DNI ou pasaporte.

Art. 80.- A función do delegado de campo é incompatible con calquera outra con motivo do encontro.

Sección Terceira.- Delegado federativo

Art. 81.- Calquera club poderá solicitar, con 5 días de antelación á xornada en que terá lugar o encontro, a designación dun delegado federativo para este.

A FGB, cando o considere oportuno, poderá nomealo de oficio.

Art. 82.- O delegado federativo presentarase no campo de xogo con unha hora de antelación á hora oficial fixada para o inicio do encontro e deberá acreditarse ante o equipo arbitral e os delegados dos equipos. Deberá permanecer no campo de xogo durante a totalidade do encontro e, se for preciso, con posterioridade a este.

Art. 83.- Durante o encontro o delegado federativo ocupará un lugar que non será a mesa de anotadores. Serán funcións do delegado federativo as seguintes:

- Esixir o cumprimento das disposicións contidas no regulamento xeral e bases de competición correspondentes.
- Realizar obrigatoriamente un informe sobre as incidencias rexistradas antes, durante e con posterioridade ao encontro. O dito informe estará en poder da FGB dentro das 48 horas seguintes ao desenvolvemento do partido.

Art. 84.- En ningún caso poderá o delegado federativo interferir nas funcións dos árbitros.

Art. 85.- Os gastos que orixine a petición de delegado federativo serán por conta do club que o solicite ou por conta da FGB cando esta o nomee de oficio.

TITULO SEGUNDO COMPETICIONES

CAPÍTULO PRIMEIRO

NORMAS XERAIS

Sección Primeira.- Tempada oficial

Art. 86.- A tempada comeza o día 1 de xullo de cada ano e finaliza o 30 de xuño do ano seguinte.

Sección Segunda.- Competicións oficiais

Art. 87.- Para os efectos sinalados no presente regulamento, terán a consideración de competición oficial os seguintes:

A) Campionatos en calquera das súas categorías que sexan convocados pola Federación Galega de Baloncesto.

B) Campionatos, torneos ou eliminatorias autonómicas ou zonais en calquera categoría, que sexan fase previa clasificatoria para as competicións ás que se refire o apartado anterior. A organización poderá quedar delegada na ou nas delegacións correspondentes.

C) Calquera outro campionato ou torneo, autonómico ou provincial, ao que a Federación Galega de Baloncesto lle confira expresamente a condición de competición oficial.

Anualmente nas bases de competición especificaranse as competicións oficiais que se desenvolverán no ámbito da Federación Galega de Baloncesto.

A Federación Galega de Baloncesto organizará aquelas competicións que teñan un carácter autonómico, e delega nas delegacións zonais a organización das competicións de carácter zonal.

Art. 88.- As competicións poderanse realizar dos seguintes modos:

A) Por sistema de copa: eliminatorias a un ou máis encontros, por diferenza de tinteos.

B) Por sistema de liga: nun ou máis grupos, todos contra todos, a unha ou máis voltas, nunha ou varias fases e con inclusión ou non de eliminatorias polo sistema de play-off que se disputará ao mellor dun número impar de encontros.

C) Por calquera outro sistema que se estableza.

Nas normas específicas das bases de competición reflectirase a forma de xogo destas.

Art. 89.- As competicións que se realicen por sistema de eliminatorias a un só encontro clasificarán en cada unha ao equipo vencedor do encontro. Se este rematase en empate disputarase a prórroga ou prórrogas que determinen as regras oficiais de xogo.

Art. 90.- Nos encontros pertencentes a unha eliminatoria, cando esta se xogue a dous encontros, un deles poderá finalizar en empate.

Art. 91.- Cando nun encontro un equipo chegue a encontrarse cun só xogador e, en consecuencia, os árbitros dean por finalizado o partido antes de chegar ao seu termo o tempo regulamentario de xogo, perderá este encontro ou a eliminatoria, neste último caso independentemente do resultado do outro encontro, polo que se aquel é o primeiro non haberá xa necesidade de xogar o segundo.

O anterior non será aplicable cando se trate dunha eliminatoria polo sistema de play-off.

Art. 92.- Cando un equipo non compareza a algún dos encontros ou se retire do terreo de xogo antes de que finalice oficialmente este, gañará a eliminatoria o outro equipo, polo que, unha vez producida a incomparecencia, non se disputarán os seguintes encontros pertencentes a esta eliminatoria.

Art. 93.- Os encontros de promoción entre dous equipos para ascender ou permanecer nunha categoría terán a consideración de eliminatorias para os efectos do disposto no presente regulamento. Nas normas específicas para as competicións poderanse regular promocións mediante sistema de play-off ao mellor de tres ou de cinco encontros.

Art. 94.- Cando unha competición se dispute polo sistema de liga, cada encontro dará lugar ás puntuacións seguintes:

A) Dous puntos ao equipo vencedor B) Un punto ao equipo vencido

Nos encontros que se disputen baixo o sistema de play-off, o gañador determinarase por maior número de vitorias dos encontros programados.

Art. 95.- A incomparecencia dun equipo ou a súa retirada do terreo de xogo antes de finalizar o encontro será sancionada segundo o que se establece no regulamento disciplinario.

Art. 96.- No caso de que un encontro finalice por decisión arbitral antes do termo regulamentario, o comité de competición ao sinalar o equipo culpable da interrupción poderá asimilalo a un equipo retirado do terreo de xogo, para os efectos de determinación do resultado e das sancións previstas no regulamento disciplinario.

Art. 97.- No caso de que nun encontro de liga os árbitros dean por finalizado este por quedar un só xogador nun dos dous equipos, salvo que o comité de competición aprecie intencionalidade ou mala fe neste equipo -en cuxo caso serán de aplicación os dous artigos anteriores-, o resultado final será o que sinalase o marcador no dito momento, ou o de 2-0 se ía gañando o equipo que quedou cun xogador. Neste caso non se lle descontará a este equipo ningún punto.

Art. 98.- Unha vez rematada a competición por sistema de liga, farase a clasificación final, do primeiro ao último posto, en función do total de puntos acadados por cada equipo participante na totalidade dos encontros, e de acordo co disposto neste regulamento. Se a competición inclúise encontros polo sistema de play-off, aterase ao disposto nos artigos anteriores.

Art. 99.- No caso de que nunha competición participase algún equipo sen dereito a ascenso, isto non obstará que exista unha única clasificación.

Art. 100.- Agás nos partidos das eliminatorias que se realizan a dobre confrontación, ningún partido poderá considerase finalizado se ao final do tempo de xogo do último período o tanteo está empatado. Nese caso o partido continuará con tantos períodos extras de cinco (5) minutos como sexan necesarios para desfacer o empate.

En todos os períodos extra, os equipos continuarán a xogar para as mesmas canastras que no último período e ditos períodos extras considéranse continuación do último período do partido a todos os efectos regulamentados nas Regras de Xogo da FIBA.

Deberá existir un descanso de dous minutos entre cada período extra.

Sección Terceira.- Desempates

Art. 101.- Nas competicións por sistema de copa, se ao termo dunha eliminatoria resultasen empatados a suma de tantos ambos os equipos, para decidir a eliminatoria disputarase a prórroga ou prórrogas, a continuación do segundo partido ata desfacer o empate.

Art. 102.- Nas competicións por sistema de liga, cando ao establecer as clasificacións ao final de cada xornada ou da competición nunha das súas partes ou ao final, se encontrasen dous ou máis equipos empatados a puntos, para establecer a orde definitiva procederase do seguinte modo:

A) Ata finalizar a primeira volta das competicións cuxo sistema de liga sexa a dobre volta, a orde de clasificación establecerase tendo en conta os seguintes criterios:

1º. Terase en conta a maior diferenza xeral de tantos a favor e en contra.

2º. O maior cociente xeral de tantos a favor e en contra.

3º. Os puntos conseguidos soamente entre os equipos empatados.

4º. A maior diferenza de tantos a favor e en contra entre os equipos que continúen empatados.

5º. O maior coeficiente de tantos a favor e en contra entre os equipos que continúen empatados.

B) Dende o inicio da segunda volta e ata o final de cada competición e nos campionatos a unha soa volta, a clasificación obterase da seguinte forma:

a) Se son dous os equipos empatados establecerase a súa clasificación tendo en conta os seguintes criterios:

1º. Os puntos obtidos nos partidos xogados entre eles; en primeiro lugar clasificarase o que sume máis puntos.

2º. Maior diferenza de tantos a favor e en contra tras a suma dos encontros xogados entre eles.

3º. Maior número de tantos a favor dun nos encontros xogados entre eles.

4º. Maior diferenza de tantos a favor e en contra tras a suma de todos os encontros da competición.

5º. Maior número de tantos a favor na suma de todos os encontros da competición.

b) Se son máis de dous os equipos empatados a puntos, establecerase a súa clasificación polos criterios definidos no apartado a).

Aplicándose os criterios anteriores, redúcese o número de equipos empatados, iniciarase o procedemento sinalado no apartado a) entre os equipos que sigan empatados tantas veces como sexa necesario.

c) Cando interveña, nun dos supostos anteriores, un equipo que ten na súa contra un tanteo de 2-0 ou cometa unha infracción cuxa sanción puidese ser este resultado, este ocupará a última posición de todos os equipos empatados a puntos con el, independentemente dos resultados obtidos cos equipos con que estivese empatado a puntos.

Sección Cuarta.- Encontros

Art. 103.- En todos os encontros aplicaranse as Regras Oficiais de Xogo aprobadas pola FIBA e editadas pola Federación Española de Baloncesto, coas modificacións que establece o presente regulamento xeral autorizadas por aquelas. Excepcionalmente, as bases de competición poderán modificar algunha das regras oficiais de xogo.

Art. 104.- O balón de xogo deberá reunir as características aprobadas pola Federación Galega de Baloncesto. A Xunta Directiva da Federación Galega determinará a marca e modelos de balón oficial de xogo con que se deberán disputar as competicións oficiais organizadas por esta.

Art. 105.- Considerarase que un xogador foi aliñado nun encontro se figura na acta oficial do partido.

Art. 106.- Soamente poderán permanecer no terreo de xogo e sentar no banco de cada equipo os xogadores que figuren na acta de xogo, adestrador ou adestradores; en total, os acompañantes non contarán máis de cinco persoas, sempre que conten coa licenza federativa correspondente (xogador non inscrito en acta ou delegado), expedida pola Federación Galega de Baloncesto, ou se identifiquen na forma establecida no artigo 131 do presente regulamento. O árbitro principal ordenará que se retire do banco ou lugar próximo a este calquera persoa que non cumpra as anteriores condicións. Así mesmo, ordenará que se retire do banco calquera persoa que sexa sancionada con falta descualificante, quen se deberá retirar aos vestiarios ou abandonar a instalación deportiva.

Art. 107.- Os capitáns de equipo soamente poderán asinar na acta oficial do encontro se o fan baixo protesta ou no caso de apelación na forma establecida polas Regras Oficiais de Xogo. Caso de facelo, o club estará obrigado a presentar un informe ante o comité correspondente nun prazo non superior a 48 horas que comezarán a contar dende a realización do encontro.

Art. 108.- Todo encontro considerarase xogado na data que figura no calendario oficial, aínda cando se dispute noutra. En consecuencia, para os efectos de validez de licenzas e demais requisitos regulamentarios, citarase a situación da data sinalada no calendario. Exceptúase do disposto no presente artigo o que se refire ao cumprimento de sancións, que se aterá ao previsto no artigo correspondente.

Art. 109.- Os equipos non poderán alegar ningunha causa para non disputar un encontro ou demorar o seu comezo cando sexan requiridos polos árbitros para inicialo. A súa negativa a cumprir a orde dos árbitros será considerada como incomparecencia.

Art. 110.- No caso de incomparecencia do equipo arbitral, este poderase substituír por persoas presentes, aínda cando non sexan colexiados, se están de acordo ambos os equipos, e farano constar no dorso da acta coa conformidade dos capitáns. Se só comparecese un dos árbitros designados, isto non será motivo de suspensión e o encontro disputarase co árbitro presente, quen poderá utilizar como auxiliar outro colexiado se o houbese e sempre que haxa conformidade de ambos os equipos; tamén farán constar tal incidencia na dorso da acta. Os gastos que ocasione a incomparecencia do equipo arbitral serán asumidos polo comité de árbitros correspondente.

Art. 111.- Se a incomparecencia afecta a anotador ou cronometrador, o árbitro principal poderá substituílos do modo que crea máis conveniente, co fin de que o encontro non se suspenda; farase constar tal incidencia no dorso da acta.

Art. 112.- Cando do informe arbitral ou informes complementarios deste se desprenda que o resultado que reflicte a acta é anormal e que a arbitraxe non puido ser realizada libremente debido á actitude coactiva do público ou doutras circunstancias que fixesen temer pola integridade física do equipo arbitral, o comité de competición correspondente determinará se o encontro se repite total ou parcialmente, incluso en terreo neutral ou a porta pechada, ou se se dá por gañador o equipo non culpable, polo resultado que reflicta a acta cando lle fose favorable e por 2-0 cando non o fose; poderáselle descontar un punto da clasificación ao equipo responsable, exonerando de sanción os compoñentes do equipo arbitral pola súa actuación. De se acordar a repetición total ou parcial do partido, os gastos e indemnizacións que procedesen con motivo desta serán asumidos polo equipo culpable.

Art. 113.- No suposto de que a acta oficial dun encontro non reflicta o resultado real deste de modo que, a xuízo do comité de competición, inflúa decisivamente ou desvirtúe o resultado final do partido, o dito comité poderá anular o encontro disputado e dispor a súa nova realización total ou parcialmente; os gastos serán asumidos pola delegación correspondente.

CAPÍTULO SEGUNDO

PARTICIPACIÓN EN COMPETICIÓN

Sección Primeira.- Principios xerais

Art. 114.- Poderán participar nas competicións que convoque anualmente a Federación Galega de Baloncesto os clubs afiliados a esta que se encontren ao corrente das súas obrigas deportivas, administrativas e económicas, teñan a categoría esixida na competición de que se trate, así como o dereito deportivo necesario e cumpran os requisitos que nelas se establezan.

Art. 115.- Para que un club ou entidade poida ser autorizado a inscribirse en competición deberá presentar na FGB, a través da súa delegación zonal correspondente e no prazo debido, a seguinte documentación:

- Ficha autonómica do club
- Fotocopia, por unha soa vez, dos estatutos aprobados pola Dirección Xeral de Deportes da Xunta de Galicia
- Depósito económico inicial ou aval bancario, que se estableza en función da categoría do club a nivel FGB (non se contabilizan as competicións non organizadas pola FGB).

O depósito económico inicial deberá ser ingresado na conta da FGB, e xustificarse no momento da inscrición mediante copia do xustificante de ingreso. Si se optase polo aval bancario, utilizarase o modelo oficial proporcionado pola FGB.

A documentación anterior deberá presentarse con anterioridade á inscrición de calquera equipo do club.

Os equipos que participen nas competicións Sénior de 1ª e 2ª División e Júnior, Cadete e Infantil de 1ª División Masculina e Feminina, estarán obrigados a inscribir e participar cun equipo na categoría inmediata inferior ou ben telo vinculado. Os que teñan equipos na mesma categoría pero en diferente competición quedarán exentos do cumprimento desta norma.

Art. 116.- Participarán en cada competición e dentro da categoría que lles corresponda os equipos que formalicen a súa inscrición e cumpran todas as demais normas e requisitos da FGB.

Nas competicións con limitación de equipos, nos cinco días seguintes á data de peche de inscrición, a FGB comunicará as vacantes producidas a través da súa páxina web oficial. Os clubs interesados en cubrir algunha destas vacantes, e de acordo co artigo 125 do presente regulamento, solicitarano por escrito antes do décimo día posterior á data de inscrición. Se por necesidades excepcionais de competición é necesario reducir estas datas, autorízase ao Comité de Actividades da FGB que negocie ante os clubs directamente implicados unha redución das ditas datas.

O Comité de Actividades resolverá en virtude do disposto no artigo 125 do presente regulamento para cubrir as vacantes.

As vacantes producidas unha vez elaborado o calendario non serán cubertas.

Art. 117.- Cada club poderá inscribir en competición o número de equipos que desexe, dentro das limitacións que para algunha categoría se estableza no presente regulamento e nas bases das respectivas competicións.

Para que un equipo dun club inscrito previamente poida ser autorizado a inscribirse en competición, deberá presentar na FGB, a través da súa delegación zonal correspondente e no prazo debido, a seguinte documentación:

- Folla de inscrición do equipo na categoría que corresponda

- Ingreso bancario da cota de afiliación

Unha vez chegada a data tope de inscrición, se non se recibiu a totalidade da documentación indicada, considerarase retirado e, se a FGB o considera oportuno, procederase á súa substitución por outro equipo.

Art. 118.- Cada club só poderá presentar un equipo masculino e outro equipo feminino nas competicións Sénior de ámbito autonómico, salvo nas competicións de 2ª, 3ª e 4ª división nas que sí estará permitido.

Os equipos pertencentes a un club que xa conte con outro equipo na competición inmediata superior, non terán dereito de ascenso e, polo tanto, a non clasificación para as eventuais eliminatorias. Para os efectos de ascenso, o seu posto será ocupado, sucesivamente por aquel outro equipo clasificado a continuación na competición de que se trate.

Nas competicións Júnior, Cadete e Infantil de 1ª División non poderá haber máis dun equipo do mesmo club.

Art. 119.- Todo equipo está obrigado a participar cos seus equipos nas competicións oficiais que lle correspondan á categoría daqueles, así como nas que as bases de competición establezan como obrigatorias.

Art. 120.- Unha vez cumpridos os requisitos e condicións que se establezan nas normas correspondentes, os clubs manterán, na competición de maior rango en que participen os seus equipos, os dereitos deportivos que lles pertencen segundo as normas xerais e vixentes e non perderán a súa categoría máis que por descenso na competición correspondente, renuncia ou sanción.

Nestes dous últimos casos, o equipo que se retire ou sexa sancionado ocupará sempre unha praza das de descenso.

Art. 121.- Todo equipo que logre unha clasificación nunha competición que lle permita o ascenso, poderá renunciar a esta nos seguintes termos:

A) A renuncia haberá de efectuarse en todo caso por escrito, asinada polo presidente do club en que se encontre integrado o equipo, dirixido á delegación correspondente.

B) A renuncia débese efectuar antes do termo da tempada oficial para que se entenda realizada a tempo (30 de xuño).

C) A renuncia fóra de tempo ocasionará o pagamento do importe dos danos e perdas que a dita decisión lle poida comportar á Administración federativa.

Art. 122.- Ademais dos efectos previstos no apartado C) do artigo anterior, os equipos que renuncien a participar na categoría que lles corresponde, para poder competir de novo deberán realizar a súa inscrición na última das categorías que organice a súa delegación correspondente.

Art. 123.- Poderán existir competicións nas seguintes categorías:

A) Sénior Masculina e Feminina

B) Júnior Masculina e Feminina

C) Cadete Masculina e Feminina D) Infantil Masculina e Feminina

E) Preinfantil Masculina e Feminina F) Minibasket (Alevín)

H) Preminibasket (Benxamín)

I) Calquera outra categoría que sexa aprobada pola asemblea xeral.

Art. 124.- A Federación Galega de Baloncesto poderá esixirlles depósitos económicos ou avais aos clubs en determinadas competicións co fin de responder á participación dos equipos que se inscribisen nelas.

Art. 125.- Establécese o seguinte sistema para cubrir as vacantes que se puidesen producir nas competicións autonómicas afectadas, salvo naqueles casos en que as súas normas específicas o recollan:

1º.- A primeira vacante destinarase en primeira opción o equipo clasificado no posto inmediateamente seguinte os ascendidos.

2º.- A seguinte o equipo descendido da competición polo seu orden de clasificación.

3º.- A seguinte o equipo clasificado a continuación do ascendido no 1º punto.

4º.- O resto de equipos con dereito deportivo, e así sucesivamente.

Sección Segunda.- Equipos: afiliacións, dilixenciamento e licenzas

Art. 126.- O número de licenzas de xogadores en vigor en cada equipo en competicións sénior ou ligas de 1ª División é de 12; é obrigatorio un mínimo de 8 en todo momento.

Excepcionalmente, nos equipos de categoría júnior, cadete, infantil e minibasket o número máximo de xogadores da súa categoría respectiva que se poderá ter á vez no curso dunha tempada é o de 15, aínda que só se poderán aliñar un máximo de 12 xogadores en cada partido.

Art. 127.- As licenzas dos xogadores han de ser necesariamente da idade do equipo que vaia xogar. Non obstante, autorízase que os xogadores con licenza de idade inmediata inferior poidan aliñarse na categoría inmediata superior. En calquera caso non se poderá aliñar ningún xogador en dous encontros que se disputen simultaneamente á mesma hora. Mentres o primeiro encontro no que foi aliñado o xogador non teña rematado non poderá inscribirse noutro. O incumprimento deste artigo considerárase aliñación indebida.

Art. 128.- O club tramitará a licenza dos seus xogadores, adestradores e delegados a través da súa delegación zonal.

Para isto, o club confeccionará o tríptico de alta inicial e a ficha individual de técnicos, delegados e xogadores; ambos os documentos poderanse solicitar nas delegacións zonais ou descargarse directamente na páxina web da FGB. A FGB poderá esixir os documentos acreditativos tanto para verificar a idade do xogador como a cualificación do técnico.

A FGB encargárase de emitir as fichas definitivas de xogadores, técnicos e delegados, o tríptico definitivo e de dalos de alta no seguro médico correspondente.

Art. 129.- Todo equipo poderá dar tres altas e tres baixas no transcurso da tempada. A Federación Galega de Baloncesto poderá admitir excepcións a esta norma, de acordo coas bases de competición ou por petición xustificada dun equipo e logo de ver o informe da delegación zonal correspondente.

Art. 130.- Salvo que nas normas de competición se sinalen as datas tope de dilixenciamento, nos encontros de fases finais autonómicas non se poderán aliñar aqueles xogadores que non presentasen a solicitude de licenza con 30 días naturais de antelación á data de iniciación dos encontros. Todas as licenzas serán dilixenciadas a través das delegacións zonais, que as remitirán á Federación Galega para a súa autorización definitiva.

Art. 131.- Para tomar parte nun encontro oficial, os equipos deberán presentar as licenzas de todos os xogadores que aliñen, dilixenciadas cunha antelación mínima de 48 horas ao encontro. A tarde do venres considerárase válida para a tramitación de licenzas para encontros do sábado ou domingo seguinte. Se algunha licenza estiver en tramitación, ademais de presentar a autorización provisional da delegación correspondente, válida para un só encontro, demostraranlle ao árbitro a identidade dos xogadores que se encontren no dito caso mediante a presentación do documento nacional de identidade, pasaporte ou outro documento oficial acreditativo, todos eles orixinais e individuais, e asinarán no dorso da acta; o equipo responsabilízase no caso de haber falsidade.

Sección Terceira.- Equipo arbitral

Art. 132.- Os encontros serán dirixidos por un ou dous árbitros e por un, dous ou tres oficiais de mesa, sempre segundo as posibilidades e segundo se determine para cada campionato. O árbitro principal será o responsable da acta oficial do encontro e revisará na media parte e ao final do encontro todas as anotacións, das que dará fe coa súa sinatura. No caso de

desconformidade co resultado do encontro, os capitáns dos equipos poderán asinar a acta "baixo protesta".

Art. 133.- O árbitro principal informará ao Comité de Competición da Federación Galega de Baloncesto, no dorso da acta de xogo, de cantas incidencias acontezan antes, durante e despois do encontro, tanto no que se refire ao cumprimento das normas que rexan para a competición, como ao comportamento dos equipos e público. Excepcionalmente poderá substituír esta obriga por un informe en prego á parte, que haberá de remitir precisamente dentro das vinte e catro horas seguintes ao final do encontro, por correo urxente ou por calquera outro sistema

Regulamento Xeral que garanta a recepción dentro do prazo. A falta de remisión do informe, dentro do expresado prazo, considérase información defectuosa.

Art. 134.- O árbitro principal do encontro coidará de que lles sexa entregado a cada equipo un exemplar da acta oficial. Outros dous exemplares remitiraos coa maior urxencia, por calquera outro sistema que garanta a recepción dentro do prazo de 48 horas da finalización do encontro, xunto co informe adicional, se procede, á delegación correspondente, segundo sexa o rango da competición. O incumprimento do prazo indicado fará que se considere a información recibida como defectuosa.

Art. 135.- Os árbitros coidarán de que se leve a cabo todo encontro que estea oficialmente programado, e suspenderano só en caso de forza maior, actitude gravemente perigosa do público ou de calquera dos equipos contendentes para a seguridade do equipo arbitral ou dos xogadores, ou por grave deficiencia técnica da instalación. En calquera outro caso non poderán suspender o encontro.

Art. 136.- Antes de comezar o encontro, o árbitro principal comprobará a identidade dos xogadores inscritos na acta mediante o exame das correspondentes licenzas e requiriralles aos que non a presenten, ou de cuxa identidade teña algunha dúbida, para que asinen no dorso da acta oficial de xogo e presenten o seu documento nacional de identidade, pasaporte ou outro documento oficial acreditativo, todos eles orixinais e individuais.

Igualmente, comprobará a identidade dos demais compoñentes do banco; os que carezan de licenza ou tarxeta de identidade de directivo de club e non xustifiquen que esta está en tramitación non poderán permanecer no banco.

Art. 137.- Cando sexa expulsado do terreo de xogo por falta descualificante un xogador, adestrador, delegado de equipo ou asimilado, o árbitro principal reterá a súa licenza, que deberá remitir dentro das 24 horas seguintes ao final do encontro e por correo urxente, xunto coa acta ou informe, se o houber, á delegación organizadora, quen lla entregará ao comité de competición correspondente. Se este requisito non se cumpre, sería considerada información defectuosa por parte do comité.

Sección Cuarta.- Liquidación de gastos zonais de arbitraje por club

Unha vez finalizado o prazo de inscrición, cada club recibirá unha notificación do comité zonal de árbitros sobre o importe mensual que terá que ingresar antes do quinto día de cada mes. Esta cantidade sairá dun rateo dos gastos de arbitraje por cada club. Ao finalizar a tempada realizarase unha liquidación definitiva das arbitaxes e o comité zonal aboará ou reclamará a cantidade diferenciada da liquidación.

No suposto de que no prazo establecido o club non pagase o anteriormente citado, notificarase o feito ao comité de disciplina competente para que tome as medidas oportunas.

CAPÍTULO TERCEIRO

Reglamento Xeral

TERREOS DE XOGO, DATAS, HORARIOS E UNIFORMES DE XOGO

Sección Primeira.- Terreos de xogo

Art. 138.- Os terreos de xogo que empreguen os clubs para os seus encontros oficiais, así como os taboleiros, aros e redes, e aqueles elementos e dispositivos de seguridade e protección, reunirán as condicións técnicas sinaladas polas Regras Oficiais de Xogo.

Cada equipo participante deberá contar cun terreo de xogo oficial, cuberto e pechado, o cal non poderá variar en toda a tempada, no que se disputarán os seus encontros; deberán reunir as condicións técnicas que establecen as Regras Oficiais de Xogo e non se admitirán en competicións aqueles equipos que na súa folla de inscrición non o fagan constar. Ao cubrir a súa ficha autonómica do club deberán especificar as características técnicas das instalacións.

O terreo de xogo será obrigatoriamente liso e non terá planos inclinados; deberá permitir a práctica do baloncesto. O campo de xogo deberá contar obrigatoriamente con marcador electrónico visible, para ambos os equipos e público, cronometraxe electrónica de vinte e catro segundos. En casos de forza maior, de non contar con sistema de cronometraxe e marcador electrónico, deberá telo manual; igualmente os clubs poñerán a disposición dos oficiais de mesa cinco taboíñas numeradas do un ao cinco para as faltas persoais, así como dúas bandeiriñas vermellas para a sinalización da cota das catro faltas, orientadas tanto aos equipos coma ao público. Dito terreo de xogo deberá estar situado dentro dos límites xeográficos da delegación a que esté adscrito.

Cada equipo disporá a ambos os lados da mesa de anotación, a unha distancia mínima de cinco metros, e a dous metros da liña lateral do terreo de xogo, de forma simétrica, a colocación de dous bancos ou cadeiras en cantidade suficiente para cada un dos equipos, e banco dos suplentes. Ao propio tempo o club locatario disporá que, pegada á mesa de anotación e diante desta, se coloque unha cadeira para que o equipo que desexe efectuar cambio de xogadores o efectúe coa máxima rapidez.

Nos encontros que participen equipos que realicen desprazamentos e en caso de suspensión destes por inclemencia atmosférica ou por calquera outra causa imprevista de antemán, esta deberá celebrarse obrigatoriamente dentro das dúas horas seguintes á marcada para o comezo do encontro. Así mesmo, se un club ofrece como cancha reserva unha cuberta e pechada e para casos de inclemencia atmosférica, ou calquera outra causa imprevista de antemán, o partido deberá disputarse dentro do prazo sinalado anteriormente. Se finalmente e por falta de previsión do equipo local se tivese que suspender definitivamente o encontro, o equipo local perderá o partido, sen lle descontar puntos na clasificación e sen que se considerase incomparecencia. A este respecto, cando equipos dun mesmo club programen partidos, nunha mesma franxa horaria coincidente e nunha mesma pista entenderase como unha das circunstancias consideradas coo falta de previsión do equipo local.

A FGB recoméndalles a todos os clubs que sexan propietarios de terreos de xogo cubertos e pechados que, dentro das súas posibilidades, utilicen nestes canastras de pé, así como ter repostos de taboleiros para o caso de cancha accidental.

O equipo local deberá facilitar o equipo visitante un mínimo de tres balóns regulamentarios para o seu quecemento.

Art. 139.- A federación organizadora ou as normas específicas dalgunhas competicións poderán modificar transitoriamente algunhas das condicións sinaladas no artigo anterior, xa sexa con carácter xeral ou particular.

Art. 140.- A condición regulamentaria dos terreos de xogo será determinada pola Federación Galega de Baloncesto, a través do órgano competente en materia técnica ou pola entidade organizadora correspondente.

Art. 141.- Os clubs que actúen como locais, deberán observar a normativa vixente en materia de policía de espectáculos e non poderán permitir o acceso ás súas instalacións a un número de persoas superior ao aforo oficial daquelas.

Art. 142.- Cando o órgano xurisdiccional correspondente determine por sanción a clausura ou suspensión do terreo de xogo dun equipo e unha vez que a dita resolución sexa executiva, o club afectado comunicará no prazo de 24 horas o escenario dos distintos encontros. Os ditos terreos de xogo deberán reunir as condicións técnicas esixidas para a categoría e ser aprobadas pola FGB.

O equipo obxecto de sanción aboalle os gastos derivados desta ao equipo visitante, co importe correspondente ao exceso de quilómetros que percorreren duplicando os de ida, dende a súa localidade á do terreo de xogo designado, con respecto aos que haberían de facerse se xogase no terreo oficial, medidos por estrada.

Sección Segunda.- Datas e horarios de encontros

Art. 143.- Na folla de inscrición cada equipo deberá fixar a hora en que darán comezo todos os seus encontros, a cal estará comprendida dentro dos límites que marquen as normas específicas de competición correspondentes. A dita hora poderase variar na forma, prazos e condicións que se establezan pola FGB ou delegación organizadora.

Aos clubs que non fagan constar o horario dos seus partidos na folla de inscrición, este seralle sinalado de oficio pola Federación Galega de Baloncesto.

Art. 144.- A hora sinalada polos clubs para os seus encontros oficiais débese fixar atendendo aos medios de transporte ordinarios dos equipos visitantes, co fin de limitar ao mínimo a súa estancia.

Art. 145.- O equipo visitante ten a obriga de viaxar no medio de transporte máis apto para chegar a disputar o encontro á hora marcada, previndo as posibilidades de atraso ou suspensión do medio elixido. A non realización desta previsión coa suficiente dilixencia poderá anular a eximente de forza maior nas incomparecencias.

Art. 146.- Para todos os efectos considerárase a data sinalada no calendario como a oficial da competición. Se esa data é domingo, considérase que o sábado é tamén día de competición.

Art. 147.- A FGB poderá establecer unha data e horario común nas dúas últimas xornadas dunha fase determinada, nos encontros que poidan afectar ao título, ascensos, descensos ou clasificación para outras competicións.

Sección Terceira.- Cambios de datas ou terreos de xogo

Art. 148.- Para autorizar cambio de data, hora ou terreo de xogo nalgún encontro e salvo que as normas específicas de cada competición o establezan, será preciso:

A) Que o club interesado o solicite, na forma establecida, coa antelación mínima de quince días á data sinalada no calendario ou a aquela que propoña, se esta fose anterior, mediante o impreso oficial que facilitan as delegacións.

B) De se tratar de cambio de data ou de hora que afecte ao horario de regreso ordinario do equipo visitante, requirirase ademais presentar a conformidade por escrito deste último, co

cambio solicitado. En casos excepcionais, ou pola modificación específica nas bases de cada competición, a FGB poderá autorizar o cambio sen este requisito.

C) Non se autorizará ningún cambio de encontro canda data de xogo sexa posterior o remate da 1ª volta ou antes de finalizala competición.

Art. 149.- A Federación Galega de Baloncesto, ou a delegación correspondente, poderá conceder o cambio solicitado, para o que abondará con que o fagan constar así no programa oficial da xornada se ambos os equipos estivesen de acordo; deberase, noutro caso, comunicar a resolución ao equipo visitante. De non acceder ao cambio, deberase comunicar a dita resolución a ambos os equipos se estivesen de acordo coa modificación e só ao solicitante noutro caso.

Calquera que sexa a resolución que recaia, non será recorrible en vía federativa. Non poderán autorizarse cambios de encontros en que a nova realización destes non sexa antes de que finalice a primeira volta da competición ou antes da conclusión da liga, salvo casos de forza maior.

Antes da penúltima xornada terán que xogarse todos os encontros aprazados.

Art. 150.- Se os clubs interesados se poñen de acordo ao respecto, a Federación Galega de Baloncesto ou a delegación correspondente poderán autorizar a variación de data, hora ou terreo de xogo, aínda que non se respecte o prazo establecido no artigo 148, sempre que non se deriven alteracións ou prexuízos para terceiros. Ambos os clubs deberán comunicarllo por escrito cando menos con 72 horas de antelación ao encontro á delegación correspondente.

Art. 151.- A Federación Galega de Baloncesto poderá dispor as variacións de data, hora ou terreo de xogo que sexan precisas para a transmisión de encontros por televisión, pola convocaotria de xogadores ou técnicos para as preseleccións ou selección galegas ou españolas ou en razón a circunstancias especiais que así o aconsellen. Neste caso procurárase a conformidade de ambos os clubs.

Art. 152.- Calquera modificación de horario, data ou terreo de xogo non autorizada expresamente pola Federación Galega de Baloncesto ou pola delegación correspondente non será válida. Non obstante, e como excepción, o árbitro do encontro poderá variar a hora ou o terreo de xogo en caso de forza maior ou emerxencia imprevisible, en cumprimento da obriga imposta de esgotar todos os medios para que os encontros se leven a cabo.

Art. 153.- A Federación Galega de Baloncesto ou a delegación correspondente, de ser o caso, publicará o calendario de encontros de cada competición e sinalará campos e horarios. A partir do momento da publicación do calendario non será admitida ningunha modificación salvo as expostas nos artigos anteriores.

Art. 154.- O previsto nesta sección poderase exceptuar nas normas específicas de cada competición.

Sección Cuarta.- Cor dos uniformes de xogo

Art. 155.- No caso de que, a xuízo dos árbitros, a cor dos uniformes de xogo de ambos os equipos poida prestar confusión, cambiará de camiseta o equipo visitante, para cuxo efecto se desprazará co oportuno repostos. Nas competicións oficiais de ámbito autonómico poderán ser utilizadas as camisetas con raias no uniforme de xogo.

Nas competicións oficiais poderán utilizarse os números de dorsales do "00 ó 99".

Art. 156.- Cando se televise un encontro será o técnico da televisión correspondente quen determinará se as cores das camisetas dos equipos poden ser confundidas. Para corrixir esta posibilidade, ambos os dous contarán, cando menos, cun xogo de camisetas de cor clara e outro de cor escura.

Art. 157.- Cando unha competición teña lugar nunha concentración considerárase como visitante, para os efectos de cambio de camiseta, o que figure en segundo lugar no programa oficial.

CAPÍTULO CUARTO

Regulamento Xeral

SUSPENSIÓN E INTERRUPCIÓN DE ENCONTROS

Art. 158.- Ningún encontro poderá ser suspendido máis que pola Federación Galega de Baloncesto en uso das súas atribucións; esta federación, unha vez estudadas as circunstancias do caso, decidirá a data en que se levará a cabo.

En caso de forza maior, os árbitros ou o delegado federativo, se o houber, exercerán esta facultade por delegación da Federación Galega de Baloncesto, á que haberán de informar inmediatamente das causas que motivasen a suspensión e das medidas adoptadas.

Non obstante, os equipos que non xogaron o encontro deberán poñerse de acordo entre si e comunicarllo ao Comité de Competición antes das 12:00 horas do mércores seguinte á data fixada para o encontro (salvo acordo en contrario do citado comité). Se non se recibise este acordo, o dito comité fixará a data, hora e terreo de xogo.

Art. 159.- Nos supostos aos que se refire o artigo anterior, o comité de competición correspondente decidirá se continúa o encontro, e sinalará, neste caso, data, hora e campo; ou se o considera finalizado, neste caso indicará en que condicións, sen prexuízo das sancións a que houber lugar.

Art. 160.- A falta de forza pública poderá motivar, en casos moi excepcionais, a suspensión do encontro, se o árbitro estima baixo a súa responsabilidade que non existían garantías para o seu desenvolvemento normal. Ante esta circunstancia, os órganos xurisdicionais federativos decidirán se se disputa o encontro ou se se dá por perdedor ao equipo local polo resultado de 0-2 e, no primeiro caso, as indemnizacións a que houber lugar.

Art. 161.- Se un encontro se tiver que interromper a causa da actitude gravemente incorrecta do público, os órganos xurisdicionais da Federación, apreciando libremente todas as circunstancias que concorran no caso -principalmente as medidas de seguridade adoptadas, a gravidade dos disturbios e o público causante destes-, resolverán se o encontro recomenzará ou se se dá por perdedor ao equipo local, ben polo resultado de 2-0, caso de que estivese gañando no momento da interrupción, ben polo tanteo que reflectise entón o marcador.

No suposto de que se acordase o reinicio do encontro, decidirán igualmente as condicións e forma en que se vai realizar, así como as indemnizacións a que houber lugar.

Art. 162.- Se un encontro se interrompese pola actitude dos compoñentes dos dous equipos contendentes, os órganos xurisdicionais darán como válido o resultado que reflectise o marcador no momento da interrupción.

Se a actitude incorrecta que motivase a interrupción fose imputable ao comportamento dun só equipo, darase como vencedor ao equipo non infractor polo resultado que houberse naquel momento, ou por 2-0 se aquel lle fose desfavorable. Cando un equipo se retire da cancha considerárase como non presentado e, en consecuencia, perderá o partido 2-0 e descontaráselle un punto na clasificación xeral.

Art. 163.- Cando un encontro se suspenda pola incomparecencia dun dos equipos contendentes e este xustifique adecuadamente a criterio do Comité de Competición, dentro do prazo establecido no artigo correspondente, a causa ou motivo da súa non presentación, os

órganos xurisdicionais federativos disporán a nova data do encontro. Aquel club asumirá a totalidade dos novos gastos de desprazamento que tivese que realizar o equipo inicialmente presentado, os gastos de arbitraje e calquera outro que a disputa do novo encontro puidese producir.

Cando un encontro non se levase a cabo pola incomparecencia dos árbitros, os órganos xurisdicionais federativos disporán a nova data deste; a delegación correspondente asumirá os gastos producidos de desprazamento ou calquera outro que tivesen que realizar os equipos sempre que estes os xustifiquen debidamente sen prexuízo das sancións a que houberse lugar. (O dito cargo imputarase ao comité de árbitros correspondente.)

Art. 164.- No suposto de que o árbitro se vise obrigado a suspender un encontro por carecer o club local da dispoñibilidade de terreo de xogo ou por non ter este as condicións ou elementos técnicos necesarios, os órganos xurisdicionais federativos, atendendo ás circunstancias concorrentes, decidirán se o encontro se disputa noutra data ou ben, polo contrario, si se dá por perdedor ao equipo local.

De ter lugar novamente o encontro, todos os gastos de arbitraje que ocasionen serán asumidos polo club local, que deberá indemnizar, ademais, o visitante coa cantidade que sinalen os órganos xurisdicionais federativos.

Cando un dos equipos participantes no encontro quede cun só xogador no terreo de xogo, o árbitro darao como finalizado e poñerá esta circunstancia no reverso da acta do partido.

CAPÍTULO QUINTO

BALÓN DE XOGO

Art. 165.- A FGB designará nas Bases de Competición o balón oficial de xogo para cada competición.

Se non aparece expresamente, entenderase como válido calquera balón de coiro da marca Molten. Autorízase aos equipos para que en cancha descuberta poidan utilizar balón de nailon ou goma, pero sempre da marca Molte.

Os equipos que figuren como locais nas competicións que non se xoguen por concentración, deberán facilitar o equipo visitante 3 balóns oficiais para o seu quencemento.

Art. 166.- A non utilización do balón oficial será considerada como falta leve e ocasionará aparelada unha multa, que se irá duplicando en caso de reincidencia dun equipo nunha mesma tempada. O importe desa multa estará tipificado no regulamento disciplinario.

Art. 167.- O tamaño do balón é o que se indica nas Regras Oficiais de Xogo, balón de minibasket para as categorías de minibasket, o de tamaño intermedio para o resto de categorías femininas e o de tamaño grande para o resto de categorías masculinas.

TÍTULO TERCEIRO

ÓRGANOS ADMINISTRATIVOS E TÉCNICOS DA FEDERACIÓN

CAPÍTULO PRIMEIRO

ÓRGANOS ADMINISTRATIVOS

Sección Primeira.- A Xerencia

Art. 168.- A Xerencia é o órgano de administración da FGB.

Á fronte da Xerencia poderá encontrarse un xerente, nomeado polo presidente da FGB. No caso de vacante, o presidente poderá delegar as ditas competencias noutro órgano ou cargo directivo da FGB.

Son funcións propias do xerente:

- a) Levar a contabilidade da Federación.
- b) Exercer a inspección económica de todos os órganos da Federación e delegacións zonais.
- c) Planificar e coordinar a actuación, en materia económica, dos distintos departamentos da Federación, e acadar dos responsables correspondentes as informacións necesarias para tal fin.
- d) Facilitarlles aos directivos e órganos federativos os datos e antecedentes que precisen para os traballos da súa competencia.
- e) Formalizar o balance de situación e as contas de ingresos e gastos esixidos pola normativa vixente.
- f) Efectuar propostas de cobramentos, gastos e pagamentos.
- g) Preparar o anteproxecto de orzamentos da Federación.
- h) Autorizar, coa súa sinatura non exclusiva, os pagamentos e toda clase de documentos bancarios.
- i) Elaborar os estudos e informes necesarios para a boa marcha da Tesourería.
- j) Canalizar a xeración dos recursos económicos propios da Federación, potenciando a captación de ingresos polo dito vieiro.
- k) Aquelas que lle sexan asignadas polo presidente da FGB.

Sección Segunda.- Secretaría Xeral

Art. 169.- A Secretaría Xeral é o órgano administrativo da Federación Galega de Baloncesto. Á fronte da Secretaría acharase un secretario xeral, nomeado polo presidente da FGB.

O secretario xeral é o fedatario e asesor da FGB e ten ao seu cargo a organización administrativa desta.

O secretario xeral actuará como secretario da asemblea xeral, xunta directiva, comisión delegada, comisión executiva e da xunta electoral central. Tamén o será dos demais órganos da Federación, aínda que nestes casos poderá delegar, expresa ou tacitamente, as súas funcións nalgunha persoa encadrada na Secretaría Xeral.

Nos órganos nos cales actúe terá voz pero non voto. En caso de ausencia será substituído pola persoa que designe o presidente.

Art. 170.- Son funcións propias do secretario xeral:

- a) Redactar a acta das sesións dos órganos en que actúa como secretario.
- b) Expedir as certificacións oportunas, co visto e praxe do presidente, dos actos e acordos adoptados polos ditos órganos.
- c) Velar polo cumprimento dos acordos citados no punto anterior.
- d) Levar os libros de rexistro e os arquivos da Federación. e) Preparar as estatísticas e a memoria da Federación.
- f) Resolver e despachar os asuntos xerais da Federación.
- g) Prestarlle o asesoramento oportuno ao presidente nos casos en que fose requirido para iso.
- h) Exercer a xefatura do persoal da Federación.
- i) Preparar a documentación e os informes precisos para as reunións dos órganos en que actúa como secretario.
- j) Coordinar a execución das tarefas dos órganos federativos.
- k) Velar polo cumprimento das normas xurídico-deportivas que afecten á actividade da Federación e acadar o asesoramento externo necesario para a boa marcha dos distintos órganos federativos.
- l) Coidar a boa orde das dependencias federativas, adoptando as medidas precisas para iso, repartindo funcións e cometidos entre os empregados e vixiando o estado das instalacións.
- m) Facilitarlles aos directivos e órganos federativos os datos e antecedentes que precisen para os traballos da súa competencia.
- n) Coidar das relacións públicas da FGB exercendo tal responsabilidade, ben directamente, ben a través dos departamentos federativos creados para tal efecto.
- o) Manter relacións coa Dirección Xeral para o Deporte en todas as cuestións administrativas que afecten a ambas as entidades así como coa FEB.
- p) Coidar do aprovisionamento e do control de stocks.
- q) Aquelas que lle sexan asignadas polo presidente da FGB.

Sección Terceira.- Tesourería

Art. 171.- A Tesourería é o órgano de xestión económica da Federación Galega de Baloncesto.

Á fronte da Tesourería acharase un tesoureiro, nomeado polo presidente da Federación entre os membros da xunta directiva.

Art. 172.- Son funcións propias do tesoureiro:

- a) Levar os libros de contabilidade da Federación, controlando a actividade manual que se efectúe sobre eles.
- b) Formalizar o balance de situación e as contas de ingresos e gastos esixidos pola normativa vixente.
- c) Efectuar a proposta de cobramentos, de gastos e de pagamentos.
- d) Regulamentar os gastos federativos.
- e) Exercer a inspección económica de todos os órganos da Federación.
- f) Propor as medidas disciplinarias oportunas ante as eventuais infraccións das normas que regulan a vida económica e financeira do baloncesto.

- g) Preparar o anteproxecto de orzamentos da Federación.
- h) Autorizar coa súa sinatura, non exclusiva, os pagamentos e toda clase de documentos bancarios.
- i) Elaborar estudos e informes necesarios para a boa marcha da Tesourería.

CAPÍTULO SEGUNDO

Regulamento Xeral

ÓRGANOS TÉCNICOS

Sección Primeira.- Normas Xerais

Art. 173.- A estrutura orgánica-técnica da Federación será a que sexa establecida polo presidente en función das necesidades que se poidan suscitar.

Art. 174.-

1. O órgano técnico básico é o comité, que estará integrado polo presidente, membro da xunta directiva, e cantos compoñentes sexan precisos para executar o seu cometido.
2. Os comités poderán formar comisións para o desenvolvemento de tarefas concretas.
3. Os comités poderán agruparse en áreas de organización.

Art. 175.- Créase o Comité de Promoción, que terá por obxecto promover a todos os niveis o deporte do baloncesto, sobre todo con aquelas categorías que precisan maior promoción, para a súa identificación a través dos medios de comunicación.

Art. 176.- A estruturación da Federación en comités deberá ter en conta a existencia de aspectos tales como as actividades nacionais, as actividades internacionais, as cuestións técnicas e as cuestións arbitrais, así como calquera outro aspecto que poida ser de interese para o baloncesto.

Art. 177.- Todos os comités que se creen, para o mellor cumprimento dos seus fins, proporán os regulamentos que regulen a súa competición, funcionamento e competencias, que se someterán á xunta directiva da Federación para a súa aprobación e estarán subordinados aos estatutos da Federación e ao presente regulamento xeral.

Sección Segunda.- Comité Galego de Árbitros

Art. 178.- No seo da Federación Galega de Baloncesto constitúese o Comité Galego de Árbitros de Baloncesto.

Art. 179.- O Comité Galego de Árbitros estará integrado por un Director Técnico e un secretario, nomeados ambos os dous polo presidente da Federación.

Art. 180.- Correspóndelle ao presidente do comité de árbitros regular a actividade da arbitrase de acordo coas funcións que se desenvolven nos artigos seguintes. As súas funcións son as establecidas no artigo 95 dos estatutos da FGB

Art. 181.- Correspóndelle ao secretario do comité:

- a) Responsabilizarse da tramitación e do arquivo da documentación do comité, de acordo cos criterios establecidos pola Secretaría Xeral e polo Comité de Actividades da FGB.
- b) Redactar as actas das sesións, así como daquelas actuacións ou decisións que se adopten no exercicio das competencias propias do comité ou do departamento técnico.
- c) Actuar coordinadamente cos departamentos de Secretaría Xeral, Administración e Comité de Actividades da FGB, todo aquilo que lles afecte como consecuencia das designacións dos árbitros para os encontros.

Art. 182.- O Director Técnico estará o fronte do Departamento Técnico Arbitral.

Sección Terceira.- Comité de Actividades

Art. 183.- O Comité de Actividades é o órgano técnico de dirección e xestión das competicións organizadas pola Federación Galega de Baloncesto.

Art. 184.-

1. O Comité de Actividades estará integrado por un presidente que recaerá nun membro da xunta directiva, e un secretario, nomeados ambos os dous polo presidente da Federación; e mais os vogais nomeados igualmente polo presidente da Federación, a proposta do presidente deste comité.
2. Serán funcións do Comité de Actividades:
 - a) Elaborar o anteproxecto das normas específicas das competicións.
 - b) Elaborar o anteproxecto do regulamento xeral e de competicións.
 - c) Resolver as incidencias e reclamacións que teñan lugar con motivo das competicións ou no transcurso dos encontros cuxa organización lle corresponda á FGB, aínda cando se encomenden a outra entidade.
 - d) Adoptar todos os acordos necesarios para a execución e desenvolvemento das competicións.
 - e) A execución de todos os traballos concernentes ao desenvolvemento de todas as competicións e campionatos autonómicos, e entre eles:
 - A inscrición de clubs, equipos e xogadores
 - Sorteos e confección de calendarios
 - Edición de horarios oficiais, resultados e clasificacións
 - Cambios de terreos de xogo, datas e horarios.

Sección Cuarta.- Escola Galega de Adestradores

Art. 185.-

- 1.- Constitúese a Escola Galega de Adestradores da FGB como órgano de formación de adestradores de baloncesto.
- 2.- A Escola Galega de Adestradores estará integrada por un director e un secretario que serán nomeados polo presidente da FGB. Os profesores serán nomeados polo presidente a proposta do director da escola, sempre que reúnan as condicións de titulación e currículo establecidas no seu propio regulamento.
- 3.- As súas funcións e competencias estableceranse de acordo coas disposicións necesarias que regulen o desenvolvemento e aplicación da lexislación vixente, sobre ensinanzas e títulos dos técnicos deportivos, e igualmente sobre as ensinanzas correspondentes ás titulacións federativas.

TÍTULO CUARTO

PROCEDIMENTOS PARA ASEMBLEAS

CAPÍTULO PRIMEIRO

PROCEDIMIENTO ORDINARIO

Art. 186.- As asembleas convocaranse segundo o procedemento establecido nos estatutos da Federación Galega de Baloncesto.

Art. 189.- A orde do día das sesións será establecida pola comisión delegada.

Art. 187.-

1.- Cada membro terá voz e voto para debater os asuntos que sexan sometidos á consideración da Asemblea.

2.- Poderán intervir naqueles temas que lles afecten directamente con voz, pero sen voto, se non son membros da asemblea xeral, o presidente saínte do último mandato e os membros da xunta directiva.

Art. 188.- En todas as sesións procederase, en primeiro lugar, ao reconto de membros presentes, e o presidente resolverá as reclamacións ou impugnacións que poidan formular estes en canto á súa inclusión ou exclusión.

Art. 189.- O presidente abrirá, suspenderá e, de ser o caso, pechará as sesións da asemblea. Conducirá os debates, regulando o uso da palabra e someterá a votación as proposicións ou medidas que se han adoptar. Resolverá as cuestións de orde e procedemento que se puidesen propor.

Poderá ampliar ou limitar as intervencións cando así o esixa a materia ou o tempo, e está facultado para amoestar e, incluso, retirarlles a palabra aos membros da asemblea que se produzan de forma irrespectuosa coa presidencia ou con outros dos seus membros.

Art. 190.- O presidente ordenará o debate e establecerá o modo de efectualo. Para tal fin, poderá dividir cada relatorio en diversas seccións, para proceder ao seu debate por separado.

Art. 191.- Os debates inicianse cunha exposición relativa ao relatorio que corresponda, a cargo do presidente ou da persoa a quen este designe.

Art. 192.- Só serán obxecto de debate particularizado aqueles temas ou preceptos que sexan obxecto de emenda e os que o presidente ou a maioría da Asemblea considerase preciso. Os temas ou preceptos non emendados entenderanse aprobados, salvo que resulten afectados por emendas aceptadas en relación con outros temas ou preceptos.

Art. 193.- Todo membro da Asemblea poderá presentar emendas aos relatorios que sexan sometidos á consideración do órgano correspondente.

As emendas deberán ser recibidas na Federación Galega de Baloncesto con quince días de antelación á realización da sesión correspondente, salvo que o texto obxecto de emenda sexa enviado con menos de trinta días de antelación á sesión, en cuxo caso o prazo de presentación das emendas reducirase proporcionalmente. Nestes supostos, ao facer o envío do relatorio especificarase o prazo da emenda.

O presidente, tras escoitar a Comisión Delegada, poderá admitir con carácter excepcional emendas presentadas fóra de prazo.

Art. 194.- Durante a sesión só poderán presentarse emendas transaccionais que pretendan aproximar o contido das emendas presentadas e o texto do relatorio. As emendas transaccionais deberán presentarse por escrito antes de iniciarse a votación do texto ou precepto correspondente. A cualificación e admisión de tales emendas corresponderalle ao presidente.

Art. 195.- Por cada emenda poderán producirse dúas quendas a favor e dúas en contra por tempo non superior a tres minutos cada unha. No caso de emendas que se formulen no mesmo sentido, o presidente poderá dividir as quendas a favor entre os emendantes.

Art. 196.- Unha vez finalizado o debate das emendas a un tema ou precepto, someterase a votación o texto que nese momento propoña o presidente. Se fose rexeitado, someteranse a votación, pola orde do seu debate, as emendas presentadas ata que algunha resulte aprobada.

Art. 197.- A aprobación das emendas requirirá a maioría simple, salvo que os estatutos da Federación Galega de Baloncesto dispoñan outra cousa.

Art. 198.- As votacións efectuaranse a man alzada, salvo o disposto nos estatutos para casos específicos.

Art. 199.- A acta da reunión poderá ser aprobada ao finalizar a sesión, sen prexuízo da súa posterior remisión aos membros da Asemblea. No caso de non aprobarse ao termo da reunión, será remitida a todos os membros da Asemblea nun tempo máximo de quince días. A acta considerarase aprobada, se unha vez transcorridos trinta días naturais dende a súa remisión non se formulase ningunha observación sobre o seu contido.

O anterior enténdese sen prexuízo do dereito dos membros da Asemblea e/ ou demais persoas físicas ou xurídicas afiliadas á FGB a impugnar os acordos adoptados segundo os trámites previstos na lexislación vixente.

CAPÍTULO SEGUNDO

PROCEDEMENTOS ESPECIAIS

Sección Primeira.- Procedementos electorais

Art. 200.- As sesións en que se proceda á elección do presidente, dos membros da Asemblea Xeral e da Comisión Delegada rexeranse polas normas electorais específicas establecidas no regulamento electoral.

Sección Segunda.- Procedemento da moción de censura

Art. 201.-

1. A sesión extraordinaria da asemblea que coñeza dunha moción de censura estará presidida polo membro de maior idade. Será iniciada cunha exposición desta por un dos seus signatarios, por un tempo máximo de vinte minutos.

O presidente da Federación poderá facer uso da palabra a continuación por un tempo máximo de vinte minutos. Ambos os intervinientes poderán facer uso da palabra en cadansúa quenda de réplica e dúplica por tempo non superior a cinco minutos cada unha.

2. A continuación poderá intervir o candidato incluído na moción de censura por un tempo non superior a vinte minutos. O presidente poderá contestar nun tempo máximo de vinte minutos. Ambos os intervinientes poderán facer uso das quendas de réplica e dúplica por tempo non superior a cinco minutos cada unha.

Art. 202.- En caso de que se presenten mocións alternativas, procederase ao seu debate, seguindo os criterios establecidos no artigo anterior e pola súa orde de presentación.

Art. 203.- Unha vez finalizado o debate, a moción ou mocións serán sometidas a votación pola orde da súa presentación. A votación será secreta e efectuarase con chamamento nominal e por papeletas, nas que se consignará si ou non, segundo se aprobe ou rexeite a moción.

Sección Terceira.- Procedemento para a reforma de estatutos

Art. 204.- Será de aplicación para a reforma de estatutos o disposto no capítulo primeiro deste título, sen máis especificacións que as previstas no Título IX dos Estatutos da Federación Galega de Baloncesto.

Sección Cuarta.- Procedemento para a extinción e disolución da Federación

Art. 205.- 1. A sesión extraordinaria da Asemblea na que se someta a debate a extinción e disolución da Federación será iniciada cunha exposición de motivos polo presidente.

Acto seguido poderán intervir cantos membros da asemblea o soliciten, por un tempo non superior a cinco minutos cada un.

A Asemblea procederá a nomear unha comisión liquidadora, cuxos membros serán propostos polo presidente de acordo coa Dirección Xeral para o Deporte da Xunta de Galicia.

Cando a extinción sexa voluntaria someterase á votación da Asemblea, que terá carácter secreto.

DISPOSICIÓN FINAL

A Comisión Delegada da FGB queda facultada para interpretar e coordinar os regulamentos da FGB, en superior interese do baloncesto, e das propias competicións, unha vez escoitadas as partes interesadas.

TÍTULO QUINTO

REGULAMENTO DISCIPLINARIO

CAPÍTULO PRIMEIRO

DISPOSICIÓN XERAIS

Art. 1.- O exercicio de réxime disciplinario deportivo, no ámbito da práctica do baloncesto, regularase polo previsto na Lei 10/1990, do 15 de outubro, do deporte; polo Real decreto 1591/1992, do 23 de decembro, sobre disciplina deportiva e outras normas ditadas no seu desenvolvemento; polo disposto nos Estatutos da Federación Galega de Baloncesto, polos preceptos contidos no presente regulamento e, supletoriamente, polo Real decreto 1398/1993, do 4 de agosto, Lei 11/1997, de 22 de agosto, xeral do deporte de Galicia.

Art. 2.- A potestade disciplinaria da FGB esténdese sobre todas as persoas que forman parte da súa estrutura orgánica; sobre os clubs deportivos e os seus directivos, os xogadores, adestradores, árbitros, comisarios de mesa e, en xeral, sobre todas aquelas persoas e entidades que, estando federadas, desenvolvan actividades técnicas ou deportivas no ámbito autonómico.

Art. 3.- O ámbito material da potestade disciplinaria da Federación Galega de Baloncesto esténdese ás infraccións das regras de xogo ou das competicións, isto é, as accións e omisións que durante o curso do xogo ou competición vulneren, impidan ou perturben o seu normal desenvolvemento; e que sexan cometidas con ocasión ou como consecuencia dos encontros organizados por ela ou polas súas delegacións zonais, así como das da conduta deportiva das persoas suxeitas á disciplina federativa cando actúen no ámbito competencial da Federación Galega de Baloncesto.

Art. 4.- A potestade disciplinaria da Federación Galega de Baloncesto correspóndelle ao Comité Galego de Competición e ao Comité Galego de Apelación.

Art. 5.- De conformidade co disposto nos Estatutos da Federación Galega de Baloncesto constituirá falta toda infracción das normas contidas nos ditos estatutos, no presente regulamento ou en calquera outra disposición ditada pola Federación.

Art. 6.- En ningún caso poderán ser sancionadas as actuacións ou omisións non tipificadas como falta en calquera das normas ás que se refire o artigo anterior.

Art. 7.- Non poderá impoñerse ningunha sanción que non se atope regulamentariamente establecida con anterioridade á comisión da falta correspondente. Non obstante, as disposicións disciplinarias terán efecto retroactivo en canto favorezan aos inculpados, aínda que ao publicarse aquelas recaese resolución firme, sempre que non se rematase de cumprir a sanción.

Art. 8.- As faltas de carácter deportivo poden ser MOI GRAVES, GRAVES, MENOS GRAVES ou LEVES.

Art. 9.- As sancións teñen carácter educativo, preventivo e correctivo, e a súa imposición terá sempre como finalidade manter o interese xeral e o prestixio do deporte do baloncesto. Na aplicación das sancións terase en conta, principalmente, a intencionalidade do infractor e o resultado da acción ou omisión.

Art. 10.- As sancións que poidan impoñerse de acordo co presente regulamento, por razón das faltas nel previstas, son as seguintes:

A) Aos xogadores, adestradores, delegados, directivos e membros do equipo arbitral:

- Inhabilitación -Suspensión -Amoestación pública -Apercibimento -Multa ou perda dos dereitos e gastos de arbitraje.

B) Aos clubs:

- Perda ou descenso de categoría
- Clausura temporal do terreo de xogo
- Realización da proba ou competición a porta pechada
- Perda do encontro ou, de ser o caso, eliminatoria, ou descualificación da competición
- Desconto de puntos na clasificación
- Multa
- Baixa na Federación

Art. 11.- En ningún caso, salvo que se trate de clubs, poderán impoñerse simultaneamente dúas sancións, agás cando unha delas sexa a de multa, e se impoña como accesoria.

Art. 12.- Se dun mesmo feito, ou de feitos sucesivos, se derivasen dúas ou máis faltas, ou estas fosen cometidas nunha mesma unidade de acto, impoñerase a sanción correspondente á falta máis grave no seu grao máximo, ata o límite que represente a suma das que se puidesen impoñer ao sancionar separadamente as faltas.

Art. 13.- A suspensión pode ser por un número determinado ou por un período de tempo.

Art. 14.- A sanción de suspensión por un determinado número de xornadas ou tempo concreto implicará a prohibición de aliñarse ou intervir en tantos encontros ou xornadas oficiais como abarque a sanción; os encontros serán inmediatos á data da resolución e seguirán a orde en que teñan lugar, aínda que por alteración do calendario, aprazamento ou suspensión dalgún encontro variase aquel.

O primeiro partido ou xornada de aplicación da sanción será o inmediato á data da resolución, salvo suspensión da súa execución acordada polos órganos disciplinarios.

Cando se lle impoña a sanción de suspensión por un número de encontros a un xogador de idade inferior á de sénior, que sexa aliñado co equipo de categoría inmediata superior, esta computarase como xornadas e cumprirase nas inmediatamente posteriores á resolución que estean programadas no calendario oficial das competicións en que poida aliñarse o xogador. Neste suposto, cando as xornadas coincidan no calendario contabilizarase para os efectos do cumprimento da sanción como unha soa xornada.

O previsto no parágrafo anterior seralles de aplicación aos adestradores que subscribisen licenza por dous equipos de acordo co establecido no presente regulamento.

Art. 15.- Cando a sanción sexa por período de tempo non serán computables para o seu cumprimento os meses en que non se dispute competición oficial, salvo que a sanción se impoña a directivos.

Art. 16.- Cando un xogador, adestrador ou delegado sexa obxecto de expulsión ou figure na acta de xogo con falta descualificante, iniciarase o procedemento ordinario; enténdese concedido o trámite de audiencia en relación cos feitos reflectidos na acta do encontro mediante o coñecemento do contido desta polos interesados.

Art. 17.- Ao termo de cada tempada, o xogador, adestrador ou delegado suspendido poderá cambiar de club, si se dan as condicións para isto, pero os encontros ou xornadas de suspensión que se atopasen pendentes cumpriranse nos termos previstos nos artigos 14 e 18 do presente regulamento.

Art. 18.- Se o suspendido non cumprise a súa sanción dentro da tempada haberá de facelo na seguinte ou seguintes; o tempo nelas computarase dende o momento en que comeza a competición en que participa ata aquel en que esta finalice, teña ou non licenza en vigor.

Tanto nun coma noutro caso a Federación reterá a licenza ata o cumprimento total da sanción, con independencia da categoría da nova licenza, se esta fose expedida.

Art. 19.- As sancións de suspensión ou inhabilitación incapacitan, non só na condición pola que foron impostas, senón tamén polo desenvolvemento de calquera outra actividade de carácter deportivo relacionada co baloncesto.

Art. 20.- Cando o Comité de Competición acorde sancionar coa perda do encontro, o resultado deste será 2-0. Nos encontros de categorías Preminibakset, Minibasket, Pre-Infantil e Infantil este resultado será de 50-0.

Art. 21.- As sancións económicas aboaranse necesariamente á Federación do Comité de Competición correspondente, dentro dos trinta días seguintes á notificación da resolución. Unha vez pasado este prazo, a cantidade que recolla a dita sanción sufrirá un incremento do vinte por cento.

Art. 22.- Os clubs son os directos responsables da boa orde e desenvolvemento dos encontros e do comportamento dos seus xogadores, adestradores, delegados e demais persoas vinculadas a eles. En consecuencia, ademais das sancións económicas previstas no presente título para ditas persoas e das que será responsable subsidiario o club, poderá impoñérselle unha multa de ata a mesma contía á que se lles impuxese ás anteditas persoas. Exceptúase desta medida o caso de multas impostas con motivo da actuación de xogadores, que lle corresponde sempre satisfacelas ao club e que se entenderán por conseguinte impostas a este.

Art. 23.- Calquera sanción poderá levar aparellada unha multa económica de acordo a entidade da infracción en base as contías referenciales seguintes:

- De 3 a 15 euros se o xogador é de categoría infantil ou cadete
- De 15 a 30 euros se o xogador é de categoría júnior
- De 30 a 60 euros se o xogador é de categoría sénior

Ata 60 euros se é asimilado a delegado, de ata 70 euros de adestrador ou delegado e de ata 120 euros se é directivo, por cada xornada que corresponda, sen que, en ningún caso, poida exceder os 600 euros.

Art. 24.- 1. A sanción de clausura dun terreo de xogo a un determinado club, implica a prohibición de utilizalo durante o número de xornadas que abarque a sanción imposta. En categoría autonómica a distancia mínima á que deberá realizarse respecto da poboación na que se atope o terreo oficial de xogo obxecto de sanción, será de 25 quilómetros.

As bases de competición específicas poderán regular a súa adecuación ao disposto neste artigo.

Se un mesmo terreo de xogo é utilizado oficialmente por varios clubs, a súa clausura só lles afectará aos equipos do club sancionado ou aos encontros nos que este fose o organizador.

Os gastos que por motivo da sanción de clausura do terreo de xogo se orixinen a terceiros serán asumidos polo club sancionado.

A sanción de clausura do terreo de xogo poderá ser substituída polo Comité de Competición ou por petición do club, en atención ás circunstancias que concorran, pola de xogar sen asistencia de público a porta pechada. Neste caso, só poderá estar presente no pavillón en que se desenvolva o partido un máximo de corenta persoas, incluídos xogadores, técnicos, directivos, equipo arbitral e empregados das instalacións, todos eles debidamente acreditados. Os xornalistas deberán estar en calquera caso acreditados. Neste suposto a Federación Galega de Baloncesto designará un delegado federativo, cuxos gastos serán sufragados polo equipo local.

Art. 25.- Os clubs serán sempre responsables das sancións pecuniarias impostas con carácter principal ou accesorio aos seus xogadores, adestradores ou delegados, pero terán dereito a repercutir contra xogadores, adestradores ou delegados sempre que estes perciban remuneración polo seu labor.

Art. 26.- Poderáselles impoñer igualmente multa aos clubs por faltas cometidas por persoas vinculadas directamente ou indirectamente a eles, aínda que estas persoas desenvolvesen a

súa actividade tan só a título honorífico. En todo caso, o club é responsable subsidiario das multas impostas a persoas a el vinculadas, distintas das enumeradas no artigo anterior.

Art. 27.- Cando na disputa dun partido amigable se produzan feitos tipificados como de moi graves ou graves neste regulamento, por pedimento dunha das partes, o órgano xurisdiccional federativo competente abrirá un expediente disciplinario e poderá impoñer as sancións que, de ser o caso, correspondan co mesmo tratamento que nun encontro oficial.

Art. 28.- Son circunstancias eximentes: o caso fortuíto, a forza maior e a lexítima defensa para evitar unha agresión.

Art. 29.- Son circunstancias atenuantes:

As expresadas no artigo anterior cando non concorran todos os requisitos necesarios para aprecialas.

A) Non ser sancionado en ningunha ocasión no seu historial deportivo.

B) A de preceder, inmediatamente á comisión da falta, provocación suficiente. C) A de proceder o culpable, por arrepentimento espontáneo, a reparar ou diminuír os efectos da falta, a dar satisfacción ao ofendido ou a confesar aquela aos órganos competentes.

D) Non ter intención de causar un mal de tanta gravidade como o que se produciu.

Art. 30.- Son circunstancias agravantes:

A) Ser reincidente. Hai reincidencia cando o autor da falta fose sancionado, con anterioridade e no transcurso da mesma tempada, por calquera infracción a disciplina deportiva de igual ou maior gravidade, ou por dúas infraccións ou máis de inferior gravidade da que neste suposto se trate.

B) Non acatar inmediatamente as decisións arbitrais, salvo que este desacato fose sancionado con infracción.

C) Provocar o desenvolvemento anormal dun encontro pola infracción cometida. D) Cometer calquera falta como espectador, tendo licenza como xogador, adestrador, delegado ou árbitro.

E) Figurar na acta como capitán do equipo.

F) Non abandonar a instalación deportiva cando é descualificado ou, de ser o caso, non permanecer no vestiario do seu equipo.

G) Cando a falta ou infracción sexa contra un membro do equipo arbitral.

Art. 31.- Cando non concorran circunstancias atenuantes nin agravantes, o comité, tendo en conta a maior ou menor gravidade do feito, imporá a sanción no grao que estime conveniente; cando se presten só circunstancias atenuantes aplicarase a sanción no seu grao mínimo e se unicamente concorren agravante ou agravantes, o grao medio ou máximo.

Cando se presenten circunstancias atenuantes e agravantes compensaranse racionalmente, segundo a súa entidade, para determinar a sanción.

Dentro dos límites de cada grao, correspóndelles aos órganos xurisdicionais, atendendo á gravidade dos feitos e demais circunstancias concurrentes, a sanción que corresponda impoñer en cada caso.

Art. 32.- Na imposición das multas, os órganos xurisdicionais federativos, atendendo aos feitos e circunstancias que concorran, fixarán a súa contía discrecionalmente ata o máximo establecido para cada suposto.

Art. 33.- Son autores da infracción os que a leven a cabo directamente, os que forzan ou inducen directamente a outro a executala e os que cooperen á súa execución eficazmente.

Art. 34.- A responsabilidade disciplinaria extínguese:

a) Por cumprimento da sanción

b) Por prescrición das infraccións

c) Por prescrición das sancións

d) Por falecemento do inculpado

e) Pola disolución do club sancionado

f) Pola perda da condición de deportista federado

As infraccións prescribirán aos tres anos, ao ano ou ao mes, segundo sexan moi graves, graves, menos graves ou leves, e o prazo de prescrición comezará a contar ao día seguinte da comisión da infracción.

O prazo de prescrición interromperase pola iniciación do procedemento sancionador, pero se este permanece paralizado durante un mes, por causa non imputable á persoa ou entidade suxeita ao dito procedemento, volverá correr o prazo correspondente; a prescrición interromperase de novo ao retomarse a tramitación do expediente.

As sancións prescribirán aos tres anos, ao ano, ou ao mes, segundo se trate das que correspondan a infraccións moi graves, graves, menos graves ou leves; o prazo de prescrición comezará a contar dende o día seguinte a aquel en que adquira firmeza a resolución pola que se impuxo a sanción, ou dende que se quebrantase o seu cumprimento se este comezase.

Art. 35.- O réxime disciplinario regulado neste regulamento enténdese sen prexuízo da responsabilidade civil ou penal en que poidan incorrer as persoas físicas ou xurídicas enmarcadas no seu artigo segundo; así como do réxime derivado das relacións laborais, que se rexen pola lexislación que en cada caso corresponda.

CAPITULO SEGUNDO

SECCIÓN PRIMEIRA DAS INFRACCIÓNS ÁS REGLAS DE XOGO

Normas xerais

Art. 36.- Son infraccións ás regras de xogo ou competición as accións ou omisións que durante o curso de xogo ou competición vulneren, impidan ou perturben o seu normal desenvolvemento.

SUBSECCIÓN PRIMEIRA

DAS INFRACCIÓNS COMETIDAS POR XOGADORES, ADESTRADORES, DELEGADOS E DIRECTIVOS E DAS SANCIÓNNS.

ART. 37- Considéranse infraccións moi graves, que serán sancionadas con suspensión de seis meses a catro anos:

A) A agresión a un compoñente do equipo arbitral, directivo, dirixente deportivo, membro do equipo contrario, adestrador, espectador ou, en xeral, a calquera persoa, cando aquela acción sexa grave ou lesiva.

B) A realización de actos que provoquen a suspensión definitiva do encontro. En caso de reincidencia poderá castigarse con inhabilitación a perpetuidade aínda cando esta non se producise dentro da mesma tempada.

C) A alteración dun documento en algú dos seus elementos ou requisitos de carácter esencial.

D) Simular un documento en todo ou en parte, de maneira que induzca o erro sobre a súa autenticidade.

E) Supoñendo en un acto a intervención de persoas que no han tido, ou atribuindo as que interviron nas declaracións ou manifestacións diferentes das que o fixeran.

ART. 38.- Consideraranse infraccións graves que serán sancionadas con suspensión de un mes a dous anos ou con suspensión de catro a nove xornadas a agresión a calquera

compoñente do equipo arbitral, dirixente ou directivo deportivo, sempre que a acción pola súa gravidade non constitúa a falta prevista no apartado A do artigo anterior.

ART. 39.- Consideraranse tamén infraccións graves, que serán sancionadas con suspensión de un mes a un ano ou con suspensión de tres a oito xornadas:

- A) A agresión a calquera persoa comprendida no artigo anterior, cando pola súa gravidade non constitúa a falta tipificada no artigo 37 do presente regulamento.
- B) Ameazar, coaccionar ou realizar actos vexatorios de palabra ou de obra, contra calquera compoñente do equipo arbitral, directivo, dirixente deportivo, membro do equipo contrario, adestrador, espectador ou en xeral contra calquera persoa.
- C) Insultar ou ofender, de forma grave ou reiterada, ás persoas indicadas no parágrafo anterior.
- D) O intento de agresión ou a agresión non consumada a calquera das persoas indicadas no apartado B) deste artigo.
- E) O incumprimento reiterado de ordes emanadas dos árbitros.

Art. 40.- Consideraranse infraccións menos graves que serán sancionadas con suspensión de unha a tres xornadas:

- A) Ameazar, coaccionar, insultar ou realizar actos vexatorios, de palabra ou obra, contra calquera xogador, adestrador, membro dos equipos contendentes ou equipo arbitral.
- B) Desobedecer as ordes ditadas polos árbitros durante o transcurso do encontro.
- C) Empregar no transcurso do xogo, medios ou procedementos violentos que atenten á integridade doutro xogador, causándolle dano ou lesión.
- D) Provocar ou incitar o público en contra da correcta marcha dun encontro.
- E) Expresarse de forma atentatoria ao decoro debido ao público, e ofender a algún espectador con palabras ou xestos.
- F) Empregar métodos violentos que atenten contra a integridade dos membros do equipo arbitral.

Art. 41.- Serán faltas leves, que serán sancionadas con apercibimento ou con suspensión de unha a tres xornadas:

- A) Protestar de forma reiterada ou airada as decisións arbitrais.
- B) Dirixirse aos árbitros, compoñentes do equipo contrario, directivos e outras autoridades deportivas con expresións de menosprezo, ou cometer actos de desconsideración cara a eles.
- C) Empregar no transcurso do xogo medios ou procedementos violentos que atenten contra a integridade doutro xogador, sen lle causar dano.
- D) Provocar a interrupción anormal dun encontro, ou ben entrar na cancha de xogo cando se está disputando o encontro, ou abandonar a zona de banco dos suplentes sen ser requirido para iso por algún membro do equipo arbitral.
- E) O incumprimento por parte do delegado de campo das súas funcións como tal.
- F) Formular observacións de forma desconsiderada a calquera membro do equipo arbitral.
- G) Menosprezar de calquera maneira a autoridade ou a dignidade de calquera compoñente do equipo arbitral, directivo ou dirixente deportivo.
- H) Cometer actos de desconsideración, ou ben dirixirse a calquera membro do equipo arbitral, dirixente deportivo, técnico, delegado ou xogador con expresións ou xestos incorrectos ou antideportivos, e sempre que estes non constitúan unha falta máis grave.
- I) Redactar documentos irrelevantes que atenten contra a disciplina deportiva ou lle falten ao respecto aos comités e directivos federativos.
- J) A descualificación dun adestrador por acumulación de técnicas sobre el mesmo.
- K) Adoptar unha actitude pasiva ou negligente no cumprimento das instrucións arbitrais
- L) O incumprimento das súas obrigas reflectidas no Regulamento Xeral da FGB.

Art. 42.- Será falta leve que será sancionada con apercibimento ou con suspensión de unha a tres xornadas: Cando sexa expulsado do terreo de xogo por falta descualificante un xogador,

adestrador, delegado ou asimilado, deberá abandonar a instalación deportiva cando é descualificado ou, de ser o caso, permanecer no vestiario do seu equipo.

SUBSECCIÓN SEGUNDA

As faltas cometidas polos compoñentes do equipo arbitral

Art. 43.- Consideraranse infraccións moi graves, que serán sancionadas con suspensión de un a catro anos, as seguintes:

- A) A agresión a xogadores, adestradores, delegados, directivos, espectadores, autoridades deportivas ou, en xeral, a calquera persoa.
- B) A parcialidade probada cara a un dos equipos.
- C) A redacción, alteración ou manipulación da acta do encontro de forma que as súas anotacións non correspondan co acontecido no terreo de xogo, ou a información maliciosa ou falsa.
- D) A non dispoñibilidade suficiente, de forma reiterada e/o usen motivación xustificada.

No caso do Apartado D podería suponer a perda da licenza federativa e a imposibilidade de solicitar a tramitación da mesma na temporada seguinte.

Art. 44.- Consideraranse infraccións graves, que se sancionarán con suspensión de 1 a 12 meses, as seguintes:

- A) A negativa a cumprir as súas funcións nun encontro ou aducir causas falsas para evitar unha designación.
- B) A incomparecencia inxustificada a un encontro, cando motive a súa suspensión.
- C) Insultar, ameazar ou coaccionar aos xogadores, adestradores, delegados ou directivos.
- D) O comportamento incorrecto e antideportivo que provoque a animosidade do público será responsabilidade subsidiaria do comité de árbitros respectivo.
- E) Dirixir encontros amigables ou doutras competicións sen a correspondente autorización da FGB ou da delegación zonal á que lle corresponda a designación a través do seu comité de árbitros.
- F) Suspende un encontro sen a concorrencia das circunstancias previstas polo regulamento para iso.
- G) O incumprimento das súas obrigas.
- H) A non dispoñibilidade suficiente, de forma reiterada e/o usen motivación xustificada.

Nos supostos dos apartados A, B, F e G impoñeráselle tamén ao colexiado a perda total ou parcial dos dereitos de arbitraje e a subvención por desprazamento se a houber.

No suposto F, cando o partido se retome, todos os gastos ocasionados por este feito serán asumidos polo comité de árbitros correspondente.

Art. 45.- Consideraranse infraccións leves, que serán sancionadas con apercibimento ou suspensión de ata oito xornadas, as seguintes:

- A) Non presentarse no terreo de xogo perfectamente uniformado, vinte minutos antes do encontro.
- B) Calquera acto de desconsideración ou dirixirse a calquera persoa con expresións ou ademáns incorrectos.
- C) A pasividade ante actividades antideportivas dos compoñentes dos equipos participantes.
- D) Cubrir de forma incompleta ou equivocada a acta ou non remitir esta, na forma e prazo establecidos regulamentariamente, e coa información defectuosa; a non remisión das licenzas retidas segundo o disposto regulamentariamente. Non facilitar os resultados na forma e prazos establecidos nas normas específicas para as competicións organizadas pola FGB.

- E) A falta de puntualidade a un encontro.
 - F) A incomparecencia inxustificada a un encontro cando non motive a suspensión deste.
 - G) O incumprimento das súas obrigas.
 - H) A falta de informe, cando lle corresponda realizalo ou sexa requirido para isto polo comité de competición sobre feitos acontecidos antes, durante ou despois dun encontro.
 - I) A falta de cumprimento por un oficial de mesa das instrucións do árbitro principal.
 - J) A non remisión da acta do encontro no prazo establecido, cando neste haxa incidentes.
- Nos supostos C, I e J poderase impoñer tamén a perda total ou parcial dos dereitos de arbitraje.
- K) A non dispoñibilidade suficiente, de forma reiterada e/o usen motivación xustificada.

SUBSECCIÓN TERCEIRA

As faltas cometidas polos clubs

ART. 46.- Consideraranse infraccións moi graves, que serán sancionadas con multa de ata 600 euros, perda do encontro ou, de ser o caso, da eliminatoria, e desconto dun punto na clasificación xeral, sen prexuízo das indemnizacións que procedan, as seguintes:

- A) A incomparecencia a un encontro ou a negativa a participar nel, en ambos os casos de forma inxustificada, por parte dun equipo do club.
- B) A retirada dun equipo do terreo de xogo unha vez comezado o encontro, impedindo que este se xogue por enteiro.
- C) A actitude incorrecta do equipo do club durante un encontro, se provoca a súa suspensión.
- D) O incumprimento por mala fe das normas referentes á dispoñibilidade dos terreos de xogo e ás condicións e elementos técnicos necesarios nestes, segundo as regras de xogo, cando motive a suspensión do encontro ou cando poña en perigo a integridade das persoas.
- E) A realización por parte do público de actos de coacción ou violencia, durante o desenvolvemento do encontro, contra os xogadores e outros membros do club visitante, os membros do equipo arbitral ou autoridades deportivas que impidan a normal terminación do partido ou que leven á súa suspensión.

A reincidencia na conduta descrita nos apartados A e B poderá ser sancionada coa descualificación do equipo do club na competición en que participe, sen prexuízo das indemnizacións a que houber lugar. Non obstante, de ser a primeira vez e concorrer, a xuízo do comité de competición, circunstancias que así o aconsellasen, podería non ser descontado o punto da clasificación xeral.

Ademais das sancións previstas no presente artigo, nos supostos contemplados nos seus apartados C e D os órganos xurisdicionais poderán apereibir de clausura e incluso acordar esta por un ou seis encontros.

Art. 47.- Consideraranse infraccións graves, que serán sancionadas con multa de ata 300 euros e perda do encontro ou, de ser o caso, da eliminatoria, as seguintes:

- A) A aliñación indebida dun xogador por non estar previsto da correspondente inscrición para o equipo ou categoría da competición e sen a autorización provisional xustificada de que a dita inscrición está en tramitación, ou por estar o xogador suspendido, ou por non estar inscrito na acta de xogo. A aliñación dun xogador nun encontro despois de ser eliminado ou descualificado, así como non dispor fidedignamente da carta de baixa ou da totalidade da documentación que se esixa na correspondente normativa e que deberá ser expedida polos órganos deportivos competentes.
- B) A falsidade na declaración de datos que resultasen fundamentais para a expedición da licenza dun xogador se este participase en competición oficial.

- C) A aliñación dun número inferior a cinco xogadores, ao inicio do encontro.
- D) O incumprimento das disposicións referentes aos terreos de xogo e elementos técnicos necesarios segundo as regras de xogo cando isto motive a suspensión do encontro.
- E) A participación en encontros amigables sen dispor da preceptiva autorización da federación correspondente.
- F) A ignición de petardos ou bengalas dentro do recinto deportivo, cando lles cause dano físico ás persoas asistentes.
- G) Nas categorías infantil e minibasket, a aliñación dun número de xogadores inferior ao esixido nas normas específicas da correspondente competición aínda que se trate de ambos equipos contendentes, así como a inobservancia das normas específicas de aliñación e participación de xogadores en cada partido.
- H) A non presenza do adestrador ou dun delegado de equipo en partidos das categorías minibasket, preminibasket e infantil.
- I) A vulneración de carácter grave de calquera outra norma de competición aprobada legal ou estatutariamente.

Art. 48.- Como excepción ao disposto no artigo anterior, se a aliñación indebida se producise sen concorrer mala fe nin neglixencia, disporase a anulación do encontro e a súa repetición, no caso de vitoria do equipo no que se dese o dito suposto; o dito xogador non poderá aliñarse no encontro de repetición.

No suposto de se repetir o encontro, todos os gastos de arbitraje que se ocasionen con motivo desta repetición serán asumidos por aquel club, que deberá indemnizar, ademais, ao outro coa cantidade que sinalen os órganos xurisdiccionais federativos.

Art. 49.- Consideraranse tamén infraccións graves, e sancionaranse con multa de ata 300 euros, e poderase apercibir de clausura do terreo de xogo e incluso acordar esta de un a seis encontros, as seguintes:

- A) As incidencias do público en xeral e o lanzamento de obxectos ao terreo de xogo en particular, que perturben de forma grave ou reiterada o desenvolvemento do encontro, provoquen as suspensións transitorias deste ou atenten á integridade física dos asistentes. Se tales accións fosen causa de suspensión definitiva do encontro, terá a consideración de falta moi grave.
- B) As agresións que o público produza contra xogadores, adestradores, delegado ou equipo arbitral, directivos e outras autoridades deportivas, durante ou despois do encontro e dentro do recinto deportivo.
- C) Non adoptar todas as medidas de prevención necesarias para evitar alteracións da orde antes, durante e despois do encontro.
- D) A conduta antideportiva de xogadores, substitutos, cando provoquen a suspensión temporal do encontro.
- E) A vulneración de carácter grave de calquera outra norma de competición aprobada legal ou estatutariamente

Art. 50.- Consideraranse infraccións leves que se sancionarán con multa de ata 300 euros:

- A) Os incidentes de público que non teñan o carácter de grave ou de moi grave.
- B) A falta de puntualidade dun equipo a un encontro cando non motive a súa suspensión, así como a non presentación con, cando menos, vinte minutos de antelación ao comezo do encontro da documentación total ou parcial dos compoñentes do equipo.
- C) O incumprimento das disposicións referentes aos terreos de xogo, condicións e elementos técnicos necesarios segundo as regras de xogo, cando non motiven a suspensión do encontro, así como a inobservancia no que respecta a vestiarios para árbitros e equipos visitantes.
- D) A falta de designación dun delegado de campo.
- E) Non xustificar a solicitude con antelación ao encontro da asistencia da forza pública.

- F) A actuación indebida dun adestrador, xogador e delegado, xa sexa por non estar provisto da correspondente inscrición para o equipo ou para a categoría da competición e sen a autorización provisional xustificativa de que a dita inscrición está en tramitación, ou por estar o adestrador suspendido.
- G) O lanzamento de obxectos ao terreo de xogo ou a realización de actos vexatorios por parte do público contra a autoridade arbitral ou equipos participantes.
- H) A actuación indebida ou falta de consideración por parte dun equipo cara ao conxunto arbitral, sen que se poida determinar a identidade dos infractores.
- I) A falta de informe por parte do club, cando o capitán dun dos seus equipos asine a acta baixo apelación.
- J) A falta de informe cando sexa requirido para iso polos órganos xurisdicionais da FGB.
- K) A rotura ou estragos ocasionados polos membros dun equipo, nas dependencias deportivas.
- L) No suposto C), cando haxa reincidencia, o órgano xurisdiccional federativo poderá suspender a utilización do terreo de xogo ou agardar polo informe do órgano ou entidade correspondente e, á vista deste, proceder á clausura daquel.
- M) As modificacións efectuadas en canto aos terreos de xogo, datas e horarios dos encontros, sen a autorización da FGB.
- N) A ignición de petardos ou bengalas dentro do recinto deportivo cando non lles causen dano físico ás persoas asistentes ao encontro.
- O) A non presenza do adestrador no encontro.
- P) A vulneración de carácter leve de calquera outra norma de competición aprobada legal ou estatutariamente.
- Q) A non remisión en tempo e forma dos DVD por parte dos equipos naquelas competicións que impliquen tal obriga.
- R) A non comunicación do resultado do encontro á Federación ou ás súas delegacións no prazo establecido nas normas específicas de cada competición.

Art. 51.- O club que se negue a satisfacer o recibo arbitral que se presente para o cobramento no encontro que se vai disputar haberá de depositar o seu importe na Federación dentro das 78 horas seguintes ao partido. No caso de non realizalo así, as federacións correspondentes poñerán en coñecemento dos órganos xurisdicionais federativos que acordarán a suspensión dos encontros necesarios en que haxa de participar o club infractor. Estes partidos declararanse por perdidos ata que non efectúe aquel pagamento cun recargo adicional do 20% sobre a totalidade do seu importe.

Este pagamento deberá realizarse con, cando menos catro días de anticipación á data de disputa do encontro cuxa suspensión sexa decretada por aquel motivo.

No caso daquelas competicións en que o pagamento se ache rateado mensualmente e dito pagamento non se efectuase, no período comprendido entre o día un e cinco de cada mes, ou ben devolvase o cheque entregado para tal fin, a Federación ou delegación poñerán en coñecemento do Comité de Competición semanalmente, para os efectos da sanción correspondente que consistirá en :

- Primeiro impagamento dentro do prazo establecido: esixirase o pagamento de recibo cun incremento do 10 %.
- Segundo impagamento dentro do prazo establecido: esixirase o pagamento do recibo cun incremento do 15%.
- Terceiro impagamento dentro do prazo establecido: esixirase o pagamento de todos os recibos da tempada que resten por pagar no momento en que se dite a resolución, cun incremento do 20% dos impagamentos ata o momento.

Se algún club acumúlase tres ou máis recibos impagados de forma consecutiva, será automaticamente descalificado de todas as competicións en que participen equipos do club.

A reincidencia na falta de pagamento do recibo arbitral, ou recibo rateado, motivará que os órganos xurisdicionais federativos poidan obrigar, sen prexuízo de posterior liquidación, ao aboamento dos recibos arbitrals de todos os encontros restantes da competición. No caso de non facelo, o equipo podería ser descualificado desta, segundo as circunstancias que concorresen en cada caso. No caso de que se presentase un recibo por importe incorrecto a un club, poderá negarse ao pagamento da diferenza, pero deberá depositarse en todo caso no prazo antes indicado o importe que considere correcto, sen que haxa lugar a recargo. Pero poderase descontar do recibo o 50% deste ao cargo do colexio de árbitros que o expida, se se estimase por órgano respectivo da Federación que era incorrecto, como sanción por producir a cuestión.

No caso de que durante o transcurso da temporada a Federación Galega de Baloncesto acodara a execución do "Depósito Inicial" dalgún club o citado club poderá ser descualificado da competición ou ben se suspenderán os encontros e daránselle por perdidos co resultado 2-0, en tanto no repoña o citado "Depósito Inicial".

Art. 52.- O equipo que se retire dunha competición por puntos, unha vez comezada esta, será sancionado coa non participación en ningunha outra competición dentro da mesma tempada e co descenso á última das categorías que organice a delegación zonal á que pertenza.

Ademais da citada sanción, os órganos xurisdicionais federativos disporán a anulación de todos os encontros que realizase o equipo retirado e impoñeralle unha multa de ata 601 euros; así mesmo, fixará a indemnización que deba satisfacerlles aos demais clubs participantes na competición.

Art. 52.-Bis: Será sancionado con multa de ata 1.500 € o club que incumpra a obriga imposta polo Artº 115 do Regulamento Xeral da FGB, en canto a necesaria inscrición e participación durante toda a competición dun equipo de base nas correspondentes competicións e non remitira os obrigados trípticos oficiais antes das datas sinaladas nas bases de competición.

CAPÍTULO TERCEIRO

DAS INFRACCIÓNS ÁS NORMAS XERAIS DEPORTIVAS

Art. 53.- Son infraccións ás normas xerais deportivas as accións e omisións non comprendidas no capítulo anterior, que sexan contrarias ao disposto na Lei do deporte e disposicións de desenvolvemento, nos estatutos e regulamentos da FGB e en calquera outra disposición federativa.

Art. 54.- Consideraranse como infraccións moi graves, que se sancionarán con suspensión de un a seis anos e multa de ata 600 euros e poderán comportar a inhabilitación a perpetuidade atendendo á gravidade do acto cometido e ao prexuízo causado, as seguintes:

A) A intervención en feitos conducentes á obtención dun resultado predeterminado nun encontro.

B) Os abusos de autoridade.

C) O quebrantamento de sancións impostas. O quebrantamento apreciarase en todos os supostos en que as sancións resulten executivas. O mesmo réxime aplicarase cando se trate do quebrantamento de medidas preventivas. Especificamente, considéranse incursos na infracción de quebrantamento de sanción imposta aos adestradores que, estando suspendidos, dirixan o seu equipo dende as bancadas e outra zona da instalación deportiva.

- D) O comportamento moi gravemente atentatorio á disciplina ou non gardar o respecto debido ás autoridades deportivas.
- E) A non participación por parte dos equipos dos clubs nas competicións oficiais que lle corresponden pola súa categoría e polos requisitos establecidos pola Federación.
- F) A promoción, incitación, consumo ou utilización de substancias e grupos farmacolóxicos prohibidos e métodos de dopaxe non regulamentarios, destinados a aumentar artificialmente as capacidades físicas dos deportistas ou a modificar os resultados establecidos das competicións.
- G) As declaracións públicas de directivos, técnicos, árbitros e deportistas ou socios que inciten os seus equipos ou os espectadores á violencia.
- I) A negativa a se someter aos controis esixidos por persoas e órganos competentes, ou calquera acción ou omisión que impida ou perturbe a correcta realización dos anteditos controis.
- J) A organización de actividades ou competicións deportivas oficiais de carácter autonómico, sen a regulamentaria autorización.

Art. 55.- Consideraranse infraccións graves, que se sancionarán con suspensión de ata un ano e multa de ata 601 euros, as seguintes:

- A) O incumprimento das ordes e instrucións federativas ditadas polos órganos competentes.
- B) Intervir en feitos consistentes en estimular con cantidades en metálico avaliadas en diñeiro ou recompensas a compoñentes dun terceiro equipo para a obtención dun resultado positivo. Sancionarase así mesmo o receptor das devanditas cantidades.
- C) O exercicio de actividades públicas ou privadas declaradas incompatibles coa actividade ou función deportiva desempeñada.
- D) As manifestacións públicas a través dun medio de comunicación social nas que se atente á ética deportiva das persoas incluídas neste regulamento ou se lles ofenda gravemente.
- E) As condutas que atenten de maneira grave a disciplina, ou non lle garden o respecto debido ás autoridades federativas.

ART. 56.- Consideraranse infraccións leves, que se sancionarán con suspensión de ata dous meses e multa de ata 300,51 euros, as seguintes:

- A) O incumprimento das ordes e instrucións ditadas polos organismos competentes cando se produzan por negligencia ou descoido escusable.
- B) As manifestacións públicas desconsideradas ou ofensivas cara a persoas ou entidades integradas na organización federativa.
- C) As manifestacións públicas contrastadas que descualifiquen a actuación de xogadores, adestradores, árbitros, directivos e clubs.

Art. 57.- Sen prexuízo das accións que poidan exercerse ante a xurisdición competente, o club que incumpra en obrigas respecto dos seus xogadores ou adestradores, dando lugar á desvinculación destes co club mediante o oportuno expediente ante os órganos xurisdicionais federativos, non poderá cubrir tales baixas durante o resto da tempada de que se trate.

Art. 58.- Sen prexuízo das accións que poidan exercerse ante a xurisdición competente, o incumprimento das obrigas por parte dun xogador ou adestrador respecto dun club, que dea lugar á desvinculación dalgún destes con aquel, mediante o oportuno expediente ante os órganos xurisdicionais federativos, determinará a imposibilidade do antedito xogador ou adestrador para actuar noutro club durante o resto da tempada de que se trate, á parte da obriga que deba cumprir co club. Tales expedientes só poderán iniciarse por pedimento dos clubs ou de tales xogadores ou adestradores como partes interesadas e lexítimas. Todo o relacionado neste capítulo considérase como materia disciplinaria.

CAPÍTULO CUARTO

DO PROCEDEMENTO SECCIÓN PRIMEIRA

Disposicións xerais

Art. 59.- De conformidade co disposto nos artigos 100 ao 108 dos Estatutos da Federación Galega de Baloncesto, é aos órganos xurisdicionais desta (Comité Galego de Competición e Comité Galego de Apelación) a quen lles corresponde exercer a potestade disciplinaria. O Comité Galego de Competición estará formado por un xuíz único e un secretario pertencente á Secretaría Xeral da FGB.

Art. 60.- O Comité Galego de Competición terá o seu secretario que asistirá ao xuíz único con voz e sen voto, redactará a acta das sesións e dará traslado dos acordos. Baixo a súa disciplina, extraída do presente regulamento, estarán xogadores, delegados, adestradores, directivos, federativos, árbitros e, en definitiva, todas aquelas persoas vinculadas e que pertencen oficialmente á FGB.

Art. 61.- O Comité de Apelación da FGB estará integrado por un xuíz único, que será auxiliado por un secretario pertencente á Secretaría da FGB. O xuíz único será o encargado de coñecer e resolver os casos que se propoñan, segundo a súa competencia, de acordo co presente regulamento e cos estatutos da FGB.

O Comité de Apelación poderá realizar probas para un mellor prover se estima que a instrución do Comité de Competición é insuficiente.

Art. 62.- O nomeamento de secretario do Comité de Apelación recaerá sempre sobre unha persoa distinta á que exerza tales funcións no Comité de Competición, sexa zonal ou da Federación Galega, ao igual que calquera membro destes.

Art. 63.- As sesións dos órganos contemplados nos artigos anteriores terán lugar cando menos semanalmente durante o período en que se disputen competicións e cantas veces o esixa a competición correspondente.

Art. 64.- O Comité Galego de Competición e o Comité de Apelación ditarán as normas necesarias para o seu propio funcionamento, ademais das establecidas.

SECCIÓN SEGUNDA

Do procedemento

SUBSECCIÓN PRIMEIRA Normas común

Art. 65.- Unicamente poderán impoñerse sancións disciplinarias en virtude do expediente instruído para o efecto segundo os procedementos regulados na presente sección. Se unha vez iniciado o procedemento sancionador, o infractor recoñece a súa responsabilidade, este poderase resolver coa imposición da sanción que proceda.

Art. 66.- O Comité Galego de Competición levará un rexistro de sancións impostas, para os efectos da posible apreciación das causas modificativas da responsabilidade do cómputo dos prazos de prescrición de infraccións e sancións.

Art. 67.- Calquera persoa ou entidade cuxos dereitos ou intereses se poidan ver afectados pola substanciación dun procedemento disciplinario poderá presentarse neste, tendo dende entón, e para os efectos de notificacións e de proposición e práctica da proba, a consideración de interesado.

Art. 68.- As providencias e resolucións recaídas nos procedementos disciplinarios, que lles afecten aos interesados nestes, serán notificados a aqueles no prazo máis breve posible, co límite máximo de dez días hábiles, de acordo coas normas establecidas na lexislación do procedemento administrativo común.

Art. 69.- As notificacións deberán conter o texto íntegro da resolución coa indicación de se é ou non definitiva, a expresión das reclamacións ou recursos que procedan, órgano ante o que houbese de se presentar e prazo para interpoñelas, indicando o medio e a dirección ao que pode dirixirse, o medio de pago e número de conta, de ser necesario, así como os beneficios por pronto pago e penalizacións por demora.

As providencias e resolucións deberán ser motivadas nos casos previstos na lexislación do Estado sobre procedemento administrativo común e cando así o dispoña a normativa vixente en materia deportiva.

SUBSECCIÓN SEGUNDA

Procedemento ordinario

Art. 70.- O procedemento ordinario será aplicable para a imposición de sancións por infracción das regras de xogo ou da competición, respecto das cales se require a intervención inmediata dos órganos xurisdiccionais federativos para garantir o normal desenvolvemento das competicións.

Art. 71.- O Comité Galego de Competición e as súas seccións resolverán con carácter xeral sobre as incidencias que se reflectan nas actas dos encontros e nos informes complementarios que emitan os árbitros, que deberán remitirse ao comité dentro das 48 horas a partir das 09:00 h do primeiro día hábil despois da finalización da xornada. Igualmente, resolverán sobre as reclamacións, alegacións, informes e probas que presenten os interesados dentro do mesmo prazo, sobre calquera incidente ou anomalía, con motivo ou ocasión dun encontro ou competición.

Unha vez transcorrido o dito prazo, o Comité de Competición non admitirá máis alegacións que as que requira expresamente.

Art. 72.- Para tomar as súas decisións o Comité de Competición terá en conta necesariamente a acta do encontro, os informes arbitrais adicionais á acta, o do delegado federativo e o do informador designado polo propio comité, se o houber, así como as alegacións dos interesados e calquera outra testemuña que considere válida.

Será tamén admisible calquera outro medio de proba do que se poida dispor, e gozará de plena liberdade na apreciación e valoración de todas as practicadas. Para isto poderá realizar de oficio cantas actuacións resulten necesarias para o exame dos feitos.

Art. 73.- Considérase evacuado o trámite de audiencia ao interesado á entrega da acta do encontro ao club e ao transcurso do prazo establecido no artigo 72 do presente regulamento.

Se existise calquera dos informes aos que se refire o artigo 73, o Comité de Competición, antes de adoptar a resolución, dará traslado do contido dos anteditos informes aos interesados, para que, no termo de 48 horas dende a súa recepción, manifesten o que estimen oportuno.

Art. 74.- O Comité de Competición, cando se dean os requisitos previstos no artigo 16 do presente regulamento, poderá impoñer suspensións provisionais ou ben adoptar calquera outra medida preventiva, mediante a oportuna resolución que deberá ser notificada ao

interesado, na que se fará constar o recurso procedente contra esta, que será o de apelación ante o Comité Galego de Apelación na forma e prazo establecidos nos artigos 60 e seguintes do presente regulamento. As suspensións provisionais computaranse como parte das sancións definitivas que se poidan impoñer no seu día.

Art. 75.- Os prazos establecidos nos artigos anteriores poderán ser modificados se os encontros corresponden a un torneo que se dispute en días consecutivos ou baixo sistemas de xogo especiais, en cuxo caso o Comité Galego de Competición establecerá o procedente mediante as oportunas instrucións que deberán ser recoñecidas polos equipos e árbitros actuantes.

Art. 76.- Nas resolucións do Comité de Competición farase constar o feito constitutivo da falta, artigos de aplicación e sanción acordada. Serán comunicados por escrito ás partes afectadas, directamente ou a través da delegación que corresponda. Aquelas resolucións que impliquen descualificación, suspensión ou inhabilitación serán anticipadas aos clubs, delegacións e, de ser o caso, ao Comité Galego de Árbitros, mediante telegrama ou telefax. A comunicación efectuada vía fax será válida sempre que acredite a súa recepción e se verifique no correspondente xustificante. Nas resolucións indícanse os recursos que contra estas procedan, así como os órganos e prazos en que haberán de se interpoñer.

En calquera caso os prazos computaranse a partir do día seguinte hábil ao da recepción das notificacións por calquera dos medios sinalados no parágrafo segundo deste artigo.

SUBSECCIÓN TERCEIRA

Procedemento extraordinario

Art. 77.- O procedemento extraordinario será aplicable pola imposición de sancións polas infraccións ás normas deportivas xerais reguladas nos artigos 54 a 59 do presente regulamento, sen prexuízo do disposto no Regulamento de competicións respecto da desvinculación entre club e xogador.

Art. 78.- O procedemento iníciase por providencia do Comité de Competición, que poderá ser ditada dos seguintes xeitos:

- A) De oficio, xa sexa por iniciativa propia ou virtude de denuncia motivada
- B) Por solicitude do interesado
- C) Por requirimento do Comité Galego de Disciplina Deportiva

Art. 79.- Ao ter coñecemento dunha suposta infracción das normas deportivas, o Comité Galego de Competición poderá acordar a instrución de información reservada antes de decretar a providencia en que se decida a incoación do expediente ou, de ser o caso, o arquivo das actuacións.

Art. 80.- Cando se acordase o arquivo das actuacións, expresaranse sucintamente as causas que o motiven e resolverase o procedente en relación co denunciante se o houber.

Art. 81.- A providencia que inicie o expediente disciplinario conterá o nomeamento de instrutor e a cuxo cargo correrá a tramitación deste, e do secretario, que asistirá a aquel na dita tramitación.

A providencia de incoación deberá serlle notificada ao inculpado.

Art. 82.-

- 1.- Ao instrutor e ao secretario sonlles de aplicación as causas de abstención e recusación previstas na lexislación do Estado para o procedemento administrativo común.
- 2.- O dereito de recusación poderá ser exercido polos interesados no prazo de tres días hábiles, que comezarán a contar a partir do día seguinte ao que teñan coñecemento da correspondente

providencia de nomeamento ante o Comité Galego de Competición, que deberá resolver no termo de tres días.

3.- Contra a resolución que se dite non se dará ningún recurso, sen prexuízo da posibilidade de alegar a recusación ao interpoñer o recurso administrativo ou xurisdiccional, segundo proceda, contra o acto que poña fin ao procedemento.

Art. 83.-

1. En calquera momento posterior á iniciación do procedemento, o Comité Galego de Competición poderá adoptar, mediante resolución motivada ditada de oficio ou tras a moción previa razoada do instrutor, as medidas provisionais que estime oportunas para asegurar a eficacia da resolución que puidese recaer no expediente.

2. As medidas provisionais deberán suxeitarse ao principio de proporcionalidade, e non poderán adoptarse no suposto de que sexan susceptibles de causar prexuízos irreparables.

3. Contra a resolución na que se adopten as medidas provisionais poderá o interesado recorrer en apelación na forma e prazo establecidos nos artigos 90 e seguintes do presente regulamento.

Art. 84.-

1. O instrutor ordenará a práctica de cantas dilixencias sexan adecuadas para o mellor esclarecemento dos feitos e, tras solicitar informes, determinará as infraccións susceptibles de sanción.

2. Especificamente, o instrutor solicitará os informes que considere necesarios para acordar ou resolver, e concretará o extremo ou extremos sobre os que se solicite o ditame.

Art. 85.-

1. O instrutor ordenará a práctica de cantas dilixencias probatorias poidan conducir ao esclarecemento dos feitos e á determinación das infraccións susceptibles de sanción.

2. Os feitos relevantes para o procedemento e a súa resolución poderán acreditarse por calquera medio de proba, unha vez que o instrutor decida a apertura da fase probatoria; durante un período de tempo non superior a vinte días hábiles nin inferior a cinco, segundo os casos, comunicaráselles aos interesados con suficiente antelación o lugar e momento da práctica das probas.

3. Así mesmo, os interesados poderán propor, en calquera momento anterior ao inicio da fase probatoria, a práctica de calquera proba ou xuntar directamente as que resulten de interese para a adecuada e correcta resolución do expediente. Contra a denegación expresa ou tácita da proba proposta, os interesados poderán propor reclamación no prazo de tres días hábiles, ante o Comité Galego de Competición, que deberá pronunciarse no termo doutros tres días sobre a admisión ou o rexeitamento da proba proposta; sen que a interposición desta reclamación paralice a tramitación do expediente.

4. As actas subscribas polos árbitros dos encontros, así como as súas ampliacións ou aclaracións, constituirán un medio documental necesario para a proba das infraccións ás regras e normas deportivas.

Art. 86.-

1. Os órganos xurisdiccionais federativos poderán, de oficio ou por solicitude do interesado, acordar a acumulación de dous ou máis expedientes sempre que entre estes se dean circunstancias de identidade ou analoxía razoable ou suficiente, de carácter subxectivo e obxectivo, que fixesen aconsellable a tramitación e resolución únicas.

2. A providencia de acumulación seralles comunicada aos interesados no procedemento.

Art. 87.-

1. Á vista das actuacións practicadas, o instrutor propondrá o sobresemento ou formulará o correspondente prego de cargos; neste comprenderá os feitos imputados, as circunstancias concorrentes e as supostas infraccións, así como as sancións que puidesen ser de aplicación.

2. No prego de cargos, o instrutor presentará unha proposta de resolución que lles será notificada aos interesados para que, no prazo de dez días hábiles, manifesten cantas alegacións consideren convenientes en defensa dos seus dereitos ou intereses. Así mesmo, no prego de cargos, o instrutor deberá propor o mantemento ou levantamento das medidas provisionais que se adoptasen.

3. Unha vez transcorrido o prazo sinalado no apartado anterior, o instrutor, sen máis tramite elevará o expediente ao Comité Galego de Competición e engadiralle, de ser o caso, as alegacións presentadas polos interesados.

4.- O instrutor poderá, por causas xustificadas, solicitarlle ao órgano competente para resolver a ampliación do prazo a que se refire o apartado anterior.

Art. 88.- A resolución do órgano competente pon fin ao expediente disciplinario deportivo e haberá de se ditar no prazo máximo de dez días hábiles, que comezarán a contar dende o día seguinte ao do elevamento do expediente polo instrutor.

SECCIÓN TERCEIRA

Dos recursos

Art. 89.- As resolucións disciplinarias ditadas en primeira instancia e por calquera procedemento polo Comité de Competición poderán ser recorridas polas persoas e entidades cuxos dereitos e intereses resulten afectados por aquelas no prazo máximo de dez días hábiles que comezarán a contar dende o día seguinte ao da notificación ante o Comité Galego de Apelación. Durante as 48 horas seguintes á recepción da resolución poderase solicitar aclaración desta, caso de estimalo necesario, e neste caso suspenderase o prazo establecido para interpoñer o recurso de apelación.

O recurso de apelación interporase ante o Comité de Competición, quen tras examinar os requisitos formais elevarao ao Comité de Apelación.

Para os anteriores efectos entenderanse como partes afectadas os clubs, xogadores, adestradores, delegados, directivos e árbitros contendentes no encontro onde se produciu o feito ou feitos obxecto de sanción.

Art. 90.- En todos os recursos deberá facerse constar:

A) Nome, apelidos e domicilio do interesado ou da persoa ou entidade que o represente.

B) O acto que recorre e os feitos que motiven a impugnación, así como a relación de probas que, propostas en primeira instancia en tempo e forma, non fosen practicadas.

C) Os preceptos regulamentarios que o recorrente considere infrinxidos así como os razoamentos en que fundamente o seu recurso.

D) A petición concreta que se formule.

E) O lugar e a data en que se interpón.

F) O recurso deberá vir acompañando do xustificante do ingreso do depósito de 30€, o cal será devolto o interesado no caso de que se estime total ou parcialmente o mesmo.

G) As sancións económicas (excepto as que teñan que ver con impagos arbitraris) terán un desconto do 50% sempre que se aboen dentro dos sete días naturais contados dende o seguinte a recepción da sanción e sempre que renuncie a formular calquer tipo de recurso en relación a mesma.

Art. 91.- Segundo se regula no Decreto de disciplina deportiva, a presentación dun recurso non suspenderá o cumprimento da sanción imposta, salvo que o órgano competente para resolvelo o acorde con carácter previo á resolución de oficio ou por petición do interesado no mesmo escrito de recurso, e ata que a dita resolución se produza.

Art. 92.- Na tramitación dos recursos non se poderán practicar outras probas que non fosen as propostas en instancia en tempo e forma e non se practicasen.

Art. 93.- A resolución do recurso confirmará, revocará ou modificará a decisión recorrida, e non poderá, en caso de modificación, derivarse maior prexuízo para o interesado, cando este sexa o único recorrente.

Art. 94.- As resolucións do Comité de Apelación serán recorribles no prazo de 15 días hábiles a partir da súa recepción ante o Comité Galego de Xustiza Deportiva, na forma establecida nos artigos 65 e seguintes da Lei 11/1997, do 22 de agosto, xeral do deporte de Galicia.

Art. 95.- O levantamento de sancións no ámbito das súas competencias poderá ser acordado pola Comisión Delegada da Federación Galega de Baloncesto por proposta do Comité Galego de Competición, con carácter rexional ou zonal, ou excepcionalmente en casos individuais, con informe previo, en todo caso, das delegacións zonais.